

## **Basef Ifimba Fagafe'ma Esis Hibrui**

### **Basef bandafi fagafe'ma esis Hibrui**

- 1:1-3 Basef Godi fataga fandawalap alihifa Jisas Krais, Nogamana ananinai atona, anen nagepe na'amba atin si'i Ahamana Godi
- 1:4-2:18 Jisas nikila' amom ensel hiami
- 3:1-4:13 Jisas nikila' Moses
- 4:14-6:20 Jisas anen Dembinai ape'inai nanda' maol nondolalima Godi
- 7:1-28 Jisas Dembinai nanda' maol nondolalima God nikila' Melkisedek
- 8:1-9:28 Jisas anen Dembinai nanda' maol nondolalima Godi nape la'afen numafi basef dambaifi God nagala' lapafi. Ea' esimbel ananimbeli balo bewa' banaga basef ifimba
- 11:1-12:29 Hiasi sagahapifa Godi sihimba'mapa waf bu'wafi ma mogailaf
- 13:1-25 Waf bu'wafi apa' mogailafi ma monda' okom Godi bo'oma apa'

### *Dei' Malogol Nogamana Godi na'ipapa basef*

<sup>1</sup> Fowa' gani God na'ipa akusapa bafasapa ape'isi na'amba, na'ipas nimaguf atef atin na'ipa amom profeta ufiawa hiawai mawalapas ma'ipasas.\* <sup>2</sup> Apa' dei' nogota ata'e a si'i nogota atamba anaf tigi' togatagai endilisi, nawalapa basef na'ipapa malogol Nogamana ananinai. God nandandepana ma nemaf akutaifi anen

---

\* **1:1:** Sam 2:8; Mt 21:38; Jo 1:3

a' nope dembinaima hiahaom hiami ma itap ana'e moloma esis amam nematawa wapani. Anen atona nofa'as numafias. Fowa' gani God na'i aho' ma nogamana ananinai nanda' hiahaom hiami ambagof fagapaumi maloma ambagof akami magape ilif itapi hi'alam mataga magape.\* <sup>3</sup> Nogamana atona nogogala'i lu'unai Godi nahihimapa a'owa', anen ea' na'amba atin si'i God endilisi. Basef ananifi banagafi ifimba atif nowa' banaga hiahaom amamba hiami hi'alam. Anen atona nanda' apa' epes mataga be'epa hilili' nanda'asa ea', dei' nape lagol banagagili Godi wa'ol, God banagonai nugumafi hiahaom hiamii.\*

<sup>4</sup> Isimba atis dei' nataga Dembinai endilisi nikila' amom ensel hiami hi'alam. Dei' main, agol agalemba nogofa'agola ahamanai gikila' agof amom enseli ea' fasifasigil a'owa'.\* <sup>5</sup> Dei' main, fowa' God ina na'ipa anona ensel ananinai na'i,

“Ina' nogame ae'inai, ae' Ahamena ine'iwai endilisi,” owa'. Basef ifimba na'ipa Nogamana ananinai atona.

Ea' God na'ias wapani na'i,

“Ae' atiasi etaga ahamana ananiwai, anen nope Nogame ae'anai.”

God ina na'ipa anona ensela basef ifimba, owa'atin. Na'ipa nogamana ananinai atona.\*

---

\* **1:2:** 2 Ko 4:4; Ap 2:33-34; Kl 1:20; Hi 8:1  
Ap 13:33; Hi 5:5; 2 Sml 7:14; 1 Kro 17:13

\* **1:3:** Fl 2:9 \* **1:4:**  
\* **1:5:** Ro 8:29; Sam 97:7

<sup>6</sup> Afamba God naga'ipa nogamana ananinai nape nagali'ma hiahaom hiamii, na'ias wapani na'i,

“Amom ensel hiami Godi mondanda' lotu ma anen atona hi'indalam.”\*

<sup>7</sup> Apa' basef ifimba God naga'ipa amom enselafi na'amba na'i,

“Anen nanda' amom ensel mataga si'i fufin, nanda'am manda' maol ananini mataga si'i nif ileliwa fagalilif.”\*

<sup>8</sup> Apa' Nogamana ananinai na'ipana na'i,  
“O God, ina' nape banagonai Dembinai nugumafi hiahaom hiamii, ea' anaf nepe atapina na'amba atin dondol lifilafi.

Waf usi'ifi hilili'i atef ina' dei' nape Dembinai ma anamba ina' nagala'ambemagoma.

<sup>9</sup> Ina' okom magaila waf bu'wafi usi'ifi nandafa'ma waf awafi sogosambala mu'uliefi. Ea' dei' God, anen God ine'inai si'ina, nandandepena nase'ena dagala lu'unai a'owa'. Apa' epes hiasi hi'alas ina sandagala si'i ina', owa'atin.”\*

<sup>10</sup> Ea' God na'ias wapani na'i,  
“Dembinai, fowa' dambadamba ina' atina nanda' itap pataga, lagol ine'igili atogol ganda' ilif otaga wapani nataga nape. <sup>11</sup> Amamba anaf higililam, apa' ina' negape atapinai. Amom molomofe' mofe' anaf motaga apim si'i luwaguf apifi. <sup>12</sup> Anaf ina' nila'watefam si'i sindiwa luwaguf sagakolasif, ea' amom moho'ofam si'i luwaguf. Apa' ina' dondol

---

\* **1:6:** Sam 104:4    \* **1:7:** Sam 45:6-7    \* **1:9:** Sam 102:25-27

atapina negape na'amba atini, ea' ina anaf hageno nogota ine'itai, owa'atin.”\*

<sup>13</sup> God ina na'ipa anona ensel ananinai na'i, “Ina' nepe na'a'e lagol kwahisigili ae'agili wa'ol banagogoma,” owa'atin.

Anen na'ipa nogamana atona na'i, “Ina' nepe atapina nefe' nefe'ma nemaf afamba ae' enda' bousi ine'isi sogafe' lafela bo'wagah ine'igahi.”

God ina na'ipa anona ensela basef ifimba, owa'atin. Na'ipa nogamana ananinai atona.\*

<sup>14</sup> Dei' amom ensel mamahoma? Amom ambagof bu'wagufi manda'mana maol Godii. Anen nas-apa'am mafi'i ma mogatopalopa epes isimba dei' God nofa'as sogotanimai ma anaf sogofa' poe bu'wani.

## 2

*God nofa'ai apa' mogotanimai magape ande-  
ande', amamba lu'wami endilisi*

<sup>1</sup> Jisas nikila' amom ensel a'owa'. Isimba atis dei' apa' mondahapila basef ifimba ananifi apa' magame'afi sisihiif mondailif dindinip. Na'amba ambepama basef ifimba mondahagas mokwahona.\* <sup>2</sup> Fowa' gani God na'ipa amom ensela basef ananifi, ea' ma'ipipaef fandawalap endilisi. Dei' basef ifimba fape banagefa epes mamahisa sosambalifa owa' silifa, esis sofa' akafimi amamba mondahama du'waniga asasinai ma sogosambalif.\* <sup>3</sup> God nagwamasa akafimi

\* **1:12:** Sam 110:1    \* **1:13:** Sam 34:7, 91:11    \* **2:1:** Ga 3:19

\* **2:2:** Hi 10:29, 12:25

lu'wami esis sogosambala basef ananifi ensel amamba maga'ipasafi. Dei' ipa' ukup pandanda' pa'imama? I'i pegewa' alafugaha basef ananifi dei' natopalopapa nofa'apa mogape andeande'i, anaf ipa' pefa' pefe' pindihi'ama akafimi amamba pi'imama? Owa'atin endilisi. Pefa' akafimi pelomas. Dei' main, amamba nakwahomapa waf awafi natopalopapa mogotanimai, ina sa'umi, owa'atin. Lu'wami endilisi. Dembinai atona nali' nawalapam alihima anis epes. Epes isimba sihimba'mapa ma mogogawa basef amamba endilisim atom.\* <sup>4</sup> Ea' God nowa' banaga basef amamba ma ufiawa hiawai wawiwawi. Ano'w nihimba'masa ametal nani nani hiani banagani. Apa' ano'w nanda' banagami lu'wami mamimami si'i anen atona nanda'ami. Ea' ano'w akwamba nawalogamasi hiahaom fasimi dowaf Ambal bu'unai ananinai nagaso'asami, naila okom ananiami atom nandahamam dindi'i dondo' na'amba ma nighimba'mapa basef amamba endilisimi atom.

*Jisas nape nagali'i Dembinai nofa'apai mogape andeande'i*

<sup>5</sup> God ina nanda' amom ensel mape dambema mugumafi waf hiafi dambaifi Jisas nagawalapef ea'i, dei' aga'ipipafi, owa'atin.\* <sup>6</sup> Apa' anif basef fagail Baibeli fowa' anona aman nawalapef naga'iefi na'i,

“God, epes esis mamahisa ma ina' okom magapomas? Esis falafisi atis, ina' atina nimafias.

<sup>7</sup> Ina' nanda' amom ensel mape dambem

---

\* **2:3:** Mk 16:20; 1 Ko 12:4,11      \* **2:5:** Sam 8:4-6

banagama esis nogota bandata dowaf. Ina' naso'asa agol lu'wagili galoma gawa fasini a'owa'.\* <sup>8</sup> Ea' nanda' hiahaom hiami mafe' lafela esisa sugumafiam.”

Basef ifimba fagail Baibeli fa'i, “Aho', God nanda' epes sagape itapi sape dambes sumafi hiahaom hiami magape itapi.”

Basef ifimba fa'i hiahaom hiami magape itapi kofagefa fa'i hiahaom hi'alam. Apa' dei' ina mati epes sagape itapi sape dambes sumafi hiahaom chi'alam, ata' owa'.\* <sup>9</sup> Apa' dei' mogawa Jisas! Fowa' nogota bandata God nanda'ana nafe' lafela amom ensel. God nati apa' uwahip-ipa natopalopapa dowaf, dei' Jisas nofa' akafimi lu'wami naga' ma apa' hiapai hi'agalapa. Isimba atis dei' God naso'ana agol lu'wagili nanda'ana nataga dembinai king nogala' a'owa'.\*

<sup>10</sup> God anen Dembinai nanda' hiahaom hiami mataga mape numafiama banagami anan-imi mape andeande'. Ea' andeande'ma naga'i aho'ma Jisas nogame' akafimi nanda' ufia'w bu'wakwi ma apa'. God nanda'am na'amba ma nokolasa apa' epes hiapai nofa'apa mogafe' heven mugati mogogala'i ananiami. Dei' main, Jisas atona nanda' ufia'w ma nokwahomapa waf awafi nofa'apa mogotanimai.\* <sup>11</sup> Anen atona nanda'apa amam nematawa mataga be'epa hilili' malomana wambota atotota ahamapa atotona. Isimba atis dei' anen ina ambal aola nofalapa

---

\* **2:7:** 1 Ko 15:27    \* **2:8:** Fl 2:8-9    \* **2:9:** Ro 11:36    \* **2:10:** Mt 25:40; Mk 3:35; Jo 20:17

naga'i sahin owan ananipai, owa'atin.\* 12 Si'i anen na'ias naga'i,

“God, ae' atiasi ewalapa agol ine'igili ma esis sahin owan ae'asi. Ae' enda' awalef esa'ma agol ine'igili ma esis hiasi sunduwa'anima atogon hi'igalas.”\*

13 Ea' na'ias wapani na'i,  
“Ae' ahapifa God banagewe.”

Ea' anif wapani na'if na'i,  
“Ae' ape aloma awasi ae'asi God nagasi'iesi.”\*

*Jisas nataga epen endilisi ma nagatopalopa apa'hiapai*

14 Epes anen nogofalapa awasi ananipai, epes itapasi sogolapai. Isimba atis Jisas wapani nataga epen na'amba atin si'i apa' epes itapasi sogolasi. Anen nataga epen na'amba ma naga' nogahambombaga aman anamba Satan banagona nanda' epes hiasi sagaga'i. 15 Jisas natagwaha amam nematawa hiasi dondol ombal mahasa ga', magahapilas sisihisi. Owa' anen natagwahisa ombal amamba magahasi.\* 16 Dei' main, anen ina naga' natopalopa amom ensel, owa'atin. Anen naga'ma nagatopalopa epes sagataga wambota mini'ap Abrahami.\* 17 Isimba atis anen nataga na'amba atin endilisi si'i owasana ananisi ma nataga pris dembinai nape nagali'ma pris hiamii. Anen aman naga'i uwahipigama ape'i nanda' maol Godi andeande' endilisi ma nogatofa okom wandafunai Godi nagapoma amam nematawa

\* 2:11: Sam 22:22 \* 2:12: Ais 8:17,18 \* 2:13: Jo 12:31; 1 Jo 3:8; Re 12:10 \* 2:15: Ais 41:8-9 \* 2:16: Fl 2:7; Hi 2:14; 1 Jo 2:2, 4:10

hiasi sanda' waf awafii. <sup>18</sup> Anen atona name' akafimi ea' nofa' gwamba hiani natagamana na'i nenda'ana nonda' waf awafii. Ea' anen la'ifnai ma nogatopalopa epes isimba gwamba nagatagama-masi.

### 3

#### *Agol lu'wagili Jisasi gikila' Moses*

<sup>1</sup> Ipa' alipipai epes Godi, anen nagape ilifi nogofalipai, ipa' peme'. Ipa' ukup pendanda'ma Jisas, anen aposel nogape pris Dembinai ma waf faloma basef kofagefa apa' ea' mahapilaf magawalipasafi.\* <sup>2</sup> Anen naila okom Godi nanda' maol God nandandepanana nonda'ani, si'i fowa' Moses nanda' maol ananini datima natopalopa epes hiasi Godi hi'alas. <sup>3</sup> Aman anamba Jisas, God naso'ana agol lu'wagili gikila' agol lu'wagili Mosesi, si'i epes sagaso'ana agol lu'wagili aman nanda' ipat bu'utai nagala'atai itap apa'ii. Apa' esis ina safela agola ipat atamba lu'wagol, owa'atin. <sup>4</sup> Endilisi, ifagw hiagwi hi'alagw epes sala'agw. Ea' epen okom kilikala'ma nanda' hiahaom hiami hi'agalami, anen God atona.\* <sup>5</sup> Endilisi, Moses nanda' maola nagatopalopa epes Godi hi'alas datima andeande' nanda'an si'i nanda' maol Godi, ea' na'i basef nawalapefa hiahawes anaf owagama God noga'iasi.\* <sup>6</sup> Apa' Krai nape nogamana naila basef endilisi a'owa' nanda' maol datima ma nogape Dembinai nugumafi epes wambota Godi. I'i dondol apa' mohapifana banagepa mi'i

\* **3:1:** Hi 4:14, 6:20; Hi 7:26, 8:1; Hi 9:11; Nam 12:7      \* **3:4:** Nam 12:7  
\* **3:5:** Kl 1:23; Hi 3:14



endilisi anaf mofa' hiahaom amamba fasimi dei' mape mogohafami, dao' endilisi apa' a' mape wambota ananipai.\*

*Epes sogosambala basef Godii ina sopoma noma'w, owa'*

<sup>7</sup> Ea' dei' apa' mondame' basef Ambal bu'unai Godi naga'iefi andeande'. Anen naga'i na'amba na'i,

“Dei' nemaf mamahefa ipa' pegame' malogol ananigili,\* <sup>8</sup> ipa' ina apesopama nelelemb ipe'ilimbi sisihilimb a'owa', si'i fowa' bafasepa sanda'am sogosambala basef Godi ma sanda' okom ananinai numbutina, owa'i. Nogota atamba esis sagape anamba wafigima fataupigima esis sagwambana a'owa' sasopama nelelemb. <sup>9</sup> Esis bafasepa ipe'isi sati banagami hiami ae' anda'ami anamba wafigima ma afagof hiagufi 40-pelaiguf.

Apa' owa', owa'atin. Esis sandanda' ae' gwambai gwambae endilisi a'owa'.

<sup>10</sup> Esis sanda'me isimba atis, ae' dei' okom numbutimas endilisi a'i, 'Liflafi ukup asasipi paso'asa ufa'w bu'wakwi sololama'w. Esis ina ata' saila waf bu'wafi ae'afi, a' owa'atin.’\* <sup>11</sup> Ea' ae' okom numbutima esis a'i basef endilisifi atif banagafi a'i, 'Anaf esis ina ata' sifi'i suwis sopoma noma'w solome, owa'atin endilisi!’ ”

*Apa' a' solawaipa. Na'amba mosambala basef God si'i esis Israel.*

\* **3:6:** Sam 95:7-11  
Nam 14:21-23

\* **3:7:** Eks 17:7; Nam 20:2-5

\* **3:10:**

12 Alipipai ae'ipai, ipa' solawaipa andeande'. Na'amba anin sahin owan la'afena ipa' a' okom mimila waf awafi nekwaha hapif ananini newa' alafugama God nagape namona atapinaii.

13 Na'ambai owa'i. Apa' ipa' pendewa' banagama atina waf awafi ina fembaso'ma anin epen atitin ipe'ini ninda'ima opaf ananifi sisihiif. Penda'as na'amba atin nimaguf danda nogota ata'e God naga'i, “Dei'i” penda'as pilas pendape atapipa.\*

14 Apa' fowa' mali' mahapifana, ea' dei' mondahapifana sisihipa atapipa, mefe' motagama mogaga'. I'i apa' monda'as na'amba atapipa, dao' apa' a' amam nematawa endilisi Kraisi, ma anaf mofa' hiahaom fasimi mogalomana.\*

15 Si'i basef fagail Baibeli doko' aga'ipipafi faga'ias fa'i,

“Dei' ipa' i'i pegame' basefa malogol ananigilima, ipa' ina pesopama nelelemb ipe'ilimbi sisi-hilimb a'owa' si'i fowa' pegewa' alafugaha Goda panda' okom ananinai numbutina, owa'i.”\*

16 Fowa' epes ami same' basef malogol Godi sowa' alafugahana sanda' okom ananinai numbutina? Epes isimba hiasi fowa' Moses nofa'asi sakwaha Isip sagafi'i, ea' isimba atis.\* 17 Afagof agwafomba hiagufi 40-pelaiguf God okom numbutima ami? Anen okom numbutima epes isimba sanda' waf awafii, ea' saga' lamonas anamba wafigima fataupigima, isimba atis.\* 18 God na'i anis epes na'i basef endilisifi atif banagafi ma esis

\* 3:13: Hi 3:6 \* 3:14: Hi 3:7-8 \* 3:15: Nam 14:1-35

\* 3:16: 1 Ko 10:10 \* 3:17: Hi 3:11

ina a' sefe' suwis sopoma noma'w solomana. Na'i epes mamahisa? Anen na'i isimba atis. <sup>19</sup> Ea' dei' apa' mogawa esis ina atiasi la'ifisa sefe' suwis sopoma noma'w sogalomana, owa'atin. Dei' main, esis ina sahapifana, owa'.

## 4

### *Epes Godi sogapoma noma'w*

<sup>1</sup> Basef Godi banagafi endilisi dei' ata' fape atapif. Anen naga'ias na'amba na'i, “Ipa' pefe' piwis anamba sogapoma noma'wa ae'agima.”

Apa' a' ombal mondahapa. Na'amba God niti anin epen atitin ipe'ini okom mohan nelelama amamba nefe' higililan, owa'. <sup>2</sup> Dei' main, apa' wapani mame' basef bu'wafi si'i fowa' esis Israel sagame'afi. Apa' esis same'ef dowadowaf, ina sahapifif, owa'atin. Ea' basef ifimba bu'wafi sagame'afi ina fatopalopas kwasakwasala, owa'atin.\* <sup>3</sup> Amam nematawa magahapifa Godi apa' dei' mafe' mawis mapoma noma'w maloma God, si'i anen naga'ias na'i,

“Ae' okom numbutim ea' a'i basef endilisifi atif banagafi a'i, esis ina suwis sopoma noma'w solome, owa'atin endilisi!”

Fowa' nanda' itap apa'e hi'alap ea' napoma noma'w nogota laota nafi'i nafi'i nataga dei'. Anen napoma noma'w nasasa esis suwis sopoma noma'w sogalomana. Owa', esis ina sawis, owa'atin.\* <sup>4</sup> Anif basef God fowa' naga'iefi ma nemaf afamba fagafe'ma 7i sagapoma noma'wafi, faga'ias na'amba fa'i,

\* **4:2:** Sam 95:11; Hi 3:11      \* **4:3:** Jen 2:2

“God nanda' maol hiani hi'alan ea', nemaf afamba fagafe'ma 7i fataga, napoma noma'w.”\*

5 Basef ifimba doko'ifi God naga'ias wapani na'i,

“Esis ina sefe' suwis sopoma noma'w solome, owa'atin endilisi.”

6 Esis amam nematawa isimba fowa' sagame' basef bu'wafi ina safe' sawis, owa'. Dei' main, esis ina sahapifana endilisi, owa'. Apa' basef ifimba ata' fape atapif fa'i endilisi anis epes atiasi asofe' suwis sopoma noma'w soloma God.\*

7 Isimba atis dei' ea' nandandepa anef nemaf daiaf wapani. Ea' nofala nemaf afamba na'i dei' atef. Ea' afagof hiagufi fafe'ma ea', God nawalapa basefa nemaf afamba na'i basef ananifi doko'ifi ma malogol Deviti na'amba na'i,

“Dei' ipa' i'i pegame' basefa malogol ananigilima, ipa' ina pesopama nelelemb ipe'ilimbi bagelemb a'owa', owa'i.”\*

8 I'i nemaf afamba fowa' Josua nondas suwis sopoma noma'wai, anaf God ina ni'i anef nemaf daiaf, owa'atin. Apa' owa' owa'atin. Esis ina sawis, owa'. 9 Isimba atis dei' mogawa waf afamba mogapoma noma'wafi ata' fape atapifa apa' epes amam nematawa Godi. Waf afamba si'i God nagapoma noma'w nemaf afamba fagafe'ma 7i.\* 10 Dei' main, epes mamahisa sofe' suwis sopoma noma'w sogaloma Godi esis asambifa maol asasini ea' sapoma noma'w, si'i fowa' God nambifa maol ananini ma nagapoma noma'w.

\* 4:4: Sam 95:11 \* 4:6: Sam 95:7-8 \* 4:7: Diu 31:7; Jos

22:4 \* 4:9: Hi 4:4

11 Ea' dei' apa' mondanda' maol banagambel mofe' muwis mopoma noma'w mondalomana. Na'amba anin epen ape'ini nesambala basef Godi newa ma waf awafi anaf higililan si'i fowa' esis sanda'ama sowa higilagalas lamonas.\*

12 Dei' main, basef Godi na'if atapif fagapani, ea' banagef atapif. Ifimba hikalif a'owa' fik-ila' bainat hikakalina wa'owa'ili fapisila epes fagawis nomon endilisi. Basef ifimba fawis fafe' la'afena ukupi ambagof asasisi sondowatan-imama a' fafe' fawala so'matagwi gonat la'afisa. Ea' fawaloga ukupi nomonas ape'isi nomon.

13 Ina anom hiahaom God nanda'ami atiasi mon-dambaho'ma anen, owa'atin. Hiahaom amamba hiami hi'alam ea' mandawisi' mape mandawalap alihim endilisi ma naep ananipi. Ea' anaf apa' mi'ipana waf maif hiafi hi'ilaf apa' manda'afi.\*

*Jisas Pris Dembinai ape'inai nape nagali'ma pris hiamii*

14 Apa' anona pris Dembinai ape'inai nape nagali'ina pris hiamii nafe' nawis heven endilisi nape naloma God. Anen Jisas, Nogamana Godi. Ea' dei' apa' mondahapifa waf mahapifa God magawalapafi tetele'if. 15 Pris anamba Dembinai anen la'ifinama nogati apa' uwahipipa, nogota mamahotama apa' owa' banagepama mogahagasa waf awafia, ea' alop owa' la'ifipa ma monda' maola. Hiahaom hiami hi'alam mataga magagwamba ape'i, amamba mali' mataga magwamba anen wapani ea'. Apa' anen ina nanda' anef

---

\* **4:11:** 1 Pi 1:23; Ef 6:17; Re 1:16, 19:15; Jo 12:48      \* **4:13:** Hi 3:1, 10:23

waf awafi, owa'atin endilisi.\* <sup>16</sup> Isimba atis apa' dei' ukup banagep mondafe' felefele'ma God, ombal mogahapa owa'i. Anen nagatopalopa apa' dowafi ma magape andeande'i. Ea' apa' mofe'ma anona atiasi niti uwahipipa notopalopapa dowaf nugumafiapa nogota mamahotama mogofa' nimanimi akafimi awamiatai.

## 5

*Jisas pris Dembinai ape'inai nape nagali'ima pris hiamii, anen la'ifinai endilisi ma nogatopalopapa*

<sup>1</sup> Waf afamba fowa' sandandepa pris hiamii dembami mape magali'ma pris hiamii na'amba. Anota nogota sandandepa anona sanda'ana napoma maol Godi ma nogofa' malogof epesi nugalutu naep Godi. Esis saso'ana hiahawes fasisi naso' God nondolalimanama nogakwaha waf awafi esis sanda'afi.\* <sup>2</sup> Anen pupulina ea' ina banagona ma nonda' waf bu'wafi atef nimaguf danda, owa'. Isimba atis sanda'ana dei' la'ifinama nogatopalopa esis sagakwaha ufiaw Godi nonda'as sa'ombemas.\* <sup>3</sup> Anen pupulina, isimba atis dei' nondolali ma God nagakwaha waf awafi ananifi faloma waf awafi esis amam nematawai wapani.\* <sup>4</sup> Maol inimba nondolalima Godi nogofa' agol lu'wagilii. Ea' ina anona aman la'ifina ma nogofa' maol inimba okom ananimitom, owa'atin. God nili' nofalana, dao' nohapila maol inimba, si'i fowa' nogofala Eran.\*

---

\* 4:15: Hi 10:19 \* 5:1: Hi 4:15 \* 5:2: Lev 9:7, 16:6 \* 5:3: Eks 28:1 \* 5:4: Hi 1:5

5 Kraiſ wapani na'amba atin. Anen ina nasa'ma agol ananigili atogol nataga pris dembinai, owa'atin. God atona nandandepana nanda' maol inimba, ea' na'ipana na'i, "Ina' Nogame ae'inai. Dei' awalapena alihina asa'ma agol ine'igili lu'wagol."\*

6 Ea' God na'i basef du'wanif wapani na'ias na'amba na'i, "Ina' nepe pris Dembinai dondol liflafi nendelalimai na'amba atin nendahama Melkisedek."\*

7 Fowa' Jisas ata' nagape epen endilisi itap apa'e, nandabeten nagahali' God, la'ifinai ma nofa'ana nokwaha ga' ma nogape namona. Nandabeten, nofalana mehip nalef nape hiafi.

Anen natalogofa anen atona nafe' lafela God. Ea' dei' God name'anama beten ananini. 8 Endilisi Jisas Nogamana Godi, owa' anen name' akafimi, ea' amamba atom mawalipana endilisi ma waf nagaila okom Godi. 9 Anen nataga nogamana Godi bo'ona endilisii. Isimba atis dei' anen kofagonama epes sagaila basef ananifii nokwahomas waf awafi sofa' ambal namili sogape andeande' lifilafi.\* 10 God nandandepana ea' na'i, "Ina nepe pris Dembinai nendelalima ae' na'amba atin nendahama Melkisedek."

*Apa' ina mope si'i awasi sa'wisi gawa akasi, owa'*

11 Basef hiafi Melkisedeki ata' fape ea' dei' a'i i'ipipaef. Apa' owa' dei' ipa' ina pandagala ma pegegawa basef Godi kofagefa, owa'atin.

\* 5:5: Sam 110:4; Hi 6:20, 7:1,17      \* 5:6: Mt 26:39-46; Fl 2:6-8

\* 5:9: Hi 5:6

Ea' dei' ae' maol lu'wani ahifin a'owa' ma igi-himba'mepa basef ifimba kofagefa.\* 12 Dei' nogota ata'e ea' ma ipa' pegape dembipai tisa pigawalipa anis daias. Apa' owa' owa'atin. Ipa' gawa du'wanin atina ukup ipe'ipi, ea' anona aman ata' nowalipipa wapani ma basef fagali'i Godi. Ipa' ina banagepa pegegawa basef lu'wafi Godi si'i paga' gwa'aisi banagasi, ata' owa'. Ipa' ilama ata' pegegawa basef fagali'i Godi atif si'i paga' nomagof atogof. 13 Apa' mogawa epes mamahisa saga' nomagof atogufi, esis sagape awasi sa'wisi atis. Isimbai ina dei' la'ifisa sogawaloga waf bu'wafi awafi, ata' owa'.\* 14 Apa' gwa'aisi banagasi sapoma epes isimba ea' sagataga dambes banagasi atis. Epes isimba ea' sawalipa ukupi nomonas asasisi atis hihif dondola dei' banagesa sogawaloga waf bu'wafi awafi.

## 6

### *Apa' a' ukup kilikala' pepe ma mogohapifa God banagepa*

1-2 Apa' ina ata' atapipa mi'i basef ifimba fagali'i Kraisi atif timbi tambel, owa'. Apa' ina mi'i basef ifimba fagali'i mi'i, apa' mon-dambema nelelemba God mowa' alafugaha waf hiafi awafi fanda' epes higilgalasi ea' mon-dahapifa Goda basef fafifafi sagapisi'asa embeli sandabeten sagawamona lagofa anis epes, faloma epes hiasi sagaga'i sogosafel wapani, a

---

\* 5:11: 1 Ko 3:1-3      \* 5:13: Ro 16:19; Fl 1:10



anaf God nowawaloga epes hiasi ma sogape atapis wambel bu'wambili beloma awambili. Apa' ina mope monda' basef ifimba atif kikif atapif timbi tambel, owa'. Apa' ata' mofo'lo atefas ea' monda' basef fegewa' banagasi mi'if si'i isimba dambes ea'i.\* <sup>3</sup> I'i okom God mi'i isimbaiai, dao' monda'as na'amba atin.

<sup>4</sup> Epes isimba sowa ma waf awafi sogowa' alafugaha Godi, ina ano'w ufia'wa esis sotan-ima sifi'i sogambema nelelemb wapani, owa'atin. Esis sali' sofa' nogogala'i Godi, sofa' presen hiahaom fasimi magafi'i heveni ea', a sofa' Ambal bu'unai Godi napais.\* <sup>5</sup> Ea' sambama basef Godi sameme'mef, asogawef fasif a'owa', sameme'ma maol banagani dambaini hiani alipisi Kraisi sanda'ani.\* <sup>6</sup> I'i esis sowa ma waf awafi, sowa' alafugaha God a'owa', ina ata' ano'w ufia'wa esis sotanimai sifi'i sogambema nelelemb wapani, a' owa'atin. Waf afamba esis sanda'afi atef, dei' sandola Nogamana Godi nail lawag usi'igai ti'wanaegai wapani ma sagahambombagana. Esis sowa' alafugaha God sanda' waf na'ambai, sanda' epes hiasi sanda'ana findiwana ma basef awafi.

<sup>7</sup> Anep itap asaf falai liflafi fanda'ap panda' gwa'aisi sataga salo andeande'ma sagatopalopa amam nematawa sanda' maol itap aof afambai, itap apamba God nanda'ap pape andeande'.\* <sup>8</sup> Apa' anep itap daiap panda' otalef wandafilifi atelef hielef fagatagai, apamba falafalafipi

---

\* **6:1-2:** Hi 9:14    \* **6:4:** 1 Pi 2:3    \* **6:5:** Mt 12:31; Hi 10:26-27; 1 Jo 5:16    \* **6:7:** Jen 3:17-18

awasipi. Ea' felefele'ma God nogahambombaga itap apamba ma anaf fegandep nif lu'wafi.

<sup>9</sup> Ipa' alipipai ae'ipai endilisi, dei' ae' a'ipipa basef ifimba nimanifi, apa' owa' ae' egawa endilisi anaf ipa' ina awepa higililipa na'amba, owa'atin. Ae' egawa God anaf notopalopepa nofa'ipai pepe andeande'.\* <sup>10</sup> God ina epen aunai ma atiasi okom mogaso'ana opeh hiahi ipa' panda'ahi, owa'atin. Ipa' ukup paipailana. Isimba atis dei' sasa'mai ipa' ma panda' maol inimba ma pegatopalopa amam nematawa ananisi. Ea' dei' ata' panda'as na'amba atapipa.\* <sup>11</sup> Ae' okom ma'i ipa' hipai atona atin ukup kilikala' pelele' na'amba atin pefe' pefe' petagama nemaf afamba Krai nogafi'afii ma pegegawa endilisi anaf anen nogofa'i ipa'. <sup>12</sup> Ae' a'i ipa' ina ala'uta tehepa, owa'i. Ipa' pindaila waf epes isimba sagahapifa God endilisii ma esis owa' ukup iwanip kwafalisa, sogofa' hiahaom bu'wami fowa' God na'iasa basef nagala' lapafi na'i nogaso'asam epes ananisii.

*Apa' mondahapifa basef God nagala' lapafi andeande'*

<sup>13</sup> Fowa' God naloma Abraham ma'i basef endilisifi magala' lapafi. Ea' ina anona aman daiana dembinai nikila' God, ama God noga'i basef ifimba endilisifi atifa agol ananigili atogol, owa'atin. Ea' dei' God na'i basef ifimba nagala' lapafi endilisifi atifa agol ananigili atogol.\* <sup>14</sup> Anen na'i, "Dei' ae' a'i endilisi atis, etopalopena

---

\* 6:9: Hi 10:32-34    \* 6:10: Hi 3:14    \* 6:13: Jen 22:16-17

enda' wambota bafasena ine'isi sigi' sogatagai sotaga hias a'owa'."

<sup>15</sup> Ea' Abraham name' basef ifimba dei' ina ala'uta tahana kwafalis, owa'atin. Nape nasasa hiahaom fasimi God fowa' na'i noso'anam mugaila basef ifimba magala' lapafi.\*

<sup>16</sup> Waf epes saga'i basef endilisifi atif saga'if banagafi afamba. Epes saga'i basef ifimbai ma agol anona dembinai nikila' esis. I'i anin epen niga'i basef ifimbai, anin nasopama malogofa epes mamahisa sa'i sogapa'aga basef ananifii.

<sup>17</sup> Fowa' God na'i nihimba'mas okom ananiami mape atapim alihima awasi ananisi anaf sogofa' hiahaom fasimi si'i naga'ipas basef ananifi nagala' lapafi. Na'i nihimba'masa anaf anen ina nonda' anif dambaifi feha'ofa basef ifimba ananifi, owa'atin. Ifimba atif. Isimba atis dei' na'ias banages endilisi atisa agol ananigili atogol nogowa' banaga basef ifimba nagala' lapafi.\*

<sup>18</sup> Anen na'i basef ifimba nagala' lapafi, ma main na'i anif basef na'ambaif atini naga'i endilisi atisafi. Basef ifimba biafif faga'ias na'amba atin dei' fape atapif, ina anin mae neloma anis soho'ofef, owa'atin endilisi. Anen na'ipapa basef ifimba ma fegewa' banaga nelelemb ape'ilimbi endilisi, apa' amam nematawa mafa' mafe' mandambaho' felefele'ma anini. Anen na'ipapa basef ifimba ma mogohapifif tatala'if mogowa endilisi mogohapila hiahaom fasimi mape mogohafami.

<sup>19</sup> Gawa inimba ma apa' mogogawa endilisi anaf mohapila hiahaom fasimi, nagape na'amba.

---

\* **6:15:** Eks 22:10-11      \* **6:17:** Nam 23:19; 1 Sml 15:29

Gawa inimba banagani fasini mape magasasani inimba na'ambai nogombalo' opalefi ambagof ape'isi si'i sanda' anka nogombalo' sip lu'wapi nahapilap sisihip atapip pagala embel ilif. Gawa bu'wani inimba nawis hi'alan newala gani nomon bo'wagon hilili'ma lowaf lu'wafi alafugaifa sandolaf fagail si'i uta ipat Godi lu'unai heven nomon.\* <sup>20</sup> Anamba Jisas nali'apa nafe' nawis ipat anamba nomon ma nogatopalopapa. Anen nataga pris dembinai dei' nape atapina dondol lifilafi na'amba atin si'i Melkisedek.

## 7

### *Melkisedek anen pris dembinai agol ananigili lu'wagilinai endilisi*

<sup>1</sup> Aman anamba Melkisedek anen king dembinai nugumafi anembel wambel Salemi, anen pris nondolalima God Dembinai nagape ilif endilisi. Fowa' Abraham nanda' wandaf naha anom king dembami nali'amonam nafe' ma notanima nafe' wambel owa' Melkisedek natolona ea' no-falo'mana nowa' banagona.\* <sup>2</sup> Ea' Abraham nawaloga hiahawes gwa'aisi mais ananisi hi'alas ilifunamais atona atin, naso'ana du'wanis ilifunamais safe'ma Melkisedek. Apa' dei' mambema agol agalemba Melkisedek, basef kofagefa biafif. Anif fa'i king dembinai nanda' waf usi'ifi atef datimaii. Ea' anif fa'i anen king dembinai no-gaso'apa opalef awanelifii. Dei' main, anen king dembinai nugumafi wambel ambalemba Salemi, dei' mambema basef ifimba ma Salem ma'i

\* **6:19:** Lev 16:2-3; Lev 16:12,15; Hi 5:6      \* **7:1:** Jen 14:17-20

opalef awanelef.\* <sup>3</sup> Anen Ahamanai ma'mana akana. Anen bafasana wambota ananisi akana. Ea' nemaf ma'mana kogolanafi owa', ea' nemaf nagaga'afi wapani owa' sogawafa. Anen nape si'i Nogamana Godi, nape pris dembinai nogape atapina dondol lifilafii.

<sup>4</sup> Dei' ipa' ukup pendapoma Melkisedek, anen agol lu'wagilina'i endilisi. Dembinai bafamapa ape'inai nagali'i anen Abraham. Anen natambe' hiahaom hiami bu'wami atom nogofa'ama wandafi nawaloga ilifunamaim atona atin ea' nakolasom ondot atota naso'anam mafe'ma Melkisedek.\* <sup>5</sup> Amom wambota awasi bafapana Livaii anom a' mofa' maol inimba pris. Ea' mu'uli inimba God nagaso' Mosesani na'ipa amom atom manda' maol inimbai na'amba na'i amom a' mondowaloga hiahawes isimba hiasi du'wanis ilifunamais atona atin esis Israeli. Esis Israel sahin owan amamisi endilisi, ea' esis bafasana awasi Abrahami wapani. Apa' owa', owa'atin, amom Livai mofa' gwa'aisi mais hiasi du'wanis ilifunamaisa esis sahin owan amamisi. <sup>6</sup> Apa' Melkisedek ina nataga wambota amamutai, owa'. Apa' owa', anen nogofa' hiahawes du'wanis ilifunamais hiasi Abraham nogawalogasi. Ea' Melkisedek nofalo'mana na'ipana nowa' banaga aman anamba basef bu'wafi God nala' lapef fagapomanai. <sup>7</sup> Apa' ea' mogawa, aman nogofalo'manai nape ilifa aman anamba nogofa' blesin inimbai. <sup>8</sup> Amom Livai manda' maol mondolalima Godi mofa' hiahawes du'wanis ilifunamais, amom anaf mogaga'i atom.

---

\* 7:2: Sam 110:4      \* 7:4: Nam 18:21

Apa' Melkisedek nofa' hiahawes sagawalogasi du'wanis ilifunamaisi, anen nagape namunai dondol lifilafii, si'i buk Baibel naga'i. <sup>9-10</sup> Apa' ilama muga'ias na'amba.

Fowa' Melkisedek nagatagama Abraham ufa'wafi, Abraham naso'ana hiahawes isimba nogawalogasi ilifunamais du'wanis safe'ma Melkisedek. Ama main, Livai bafapana magi' mataga manda' maol inimba mofa' hiahawes isimba ilifunamais du'wanis esis Israel sagawalogasi.

Ea' na'amba atin si'i Livai nagaso'ana du'wanis Melkisedeka lagol Abrahami. Dei' main, nemaf afamba Abraham nagaso'anas Melkisedekafi, Livai owa' ata' solana notagaia, ata' nape opalef nomon bafapana Abrahami.

*Aman dambainai dei' naho'ofa pris fowa'imi*

<sup>11</sup> Fowa' esis amam nematawa sofa' basefa mu'uli inimba God nagaso' Mosesani. Kofago-nama mu'uli inimbai amom wambota Livai mahapila maol inimba pris. Apa' i'i maol inimba amom pris manda'ani ilama nenda' esis amam nematawa sotaga bo'wesa naep Godiai, dei' maina ata' anona pris dambainai nogataga wapani si'i Melkisedek, apa' ina si'i Eran? Owa'atin.

<sup>12</sup> Basef ifimba dei' fape banagef na'amba. I'i amom pris monda' hu'ufo ho'of anaf nemaf, ea' dao' basefa mu'uli inimba wapani a' nenda' hu'ufo ho'of na'amba atin. <sup>13</sup> Dembinai ape'inai basef ifimba faga'ianai, anen anota wambota daiata. Wambota ananitai ina a' anona fowa' nanda' maola belita amom magaofa mafis mais

mondolalima Godatai, owa'atin.\* 14 Apa' mogawa, Dembinai ape'inai nataga wambota Judai. Apa' Moses ina na'i anom wambota atambaimi motaga mope pris, owa'atin.

*Jisas nape pris motaga dembinai lifilafi nandahama Melkisedek*

15 Apa' mati anona pris dembinai nataga, naho'ofa amom pris magali'i, fataga anen si'i Melkisedek. Basef ifimba ma mu'uli inimba fataga faha'ofa mu'uli inimba nagali'i dei' fandawalap alihif na'amba. 16 Anen ina nataga prisa anin mu'uli epesi, a'a wambota mamahotama, owa'. Anen nataga prisa banagami ambal namili lagapaunai lifilafi dondoli.\* 17 Dei' main, basef fagail Baibeli faga'i anen fa'i, "Ina' nepe pris dembinai dondol lifilafi nandahama Melkisedek."

18 God nelefata mu'uli inimba nagaso' Mosesani ea'. Dei' main, mu'uli inimba owa' banagena negatopalopa apa'a, owa'atin.\*

19 Mu'uli inimba ina nanda' anis epes sataga bo'wes hilili' ma naep Godi, owa'atin. Ea' dei' God nandogwa ano'w ufiaw, akwamba bu'wakwi kwikila' mu'uli inimba, dei' ufiaw akwamba ato'w apa' mofe' felefele'ma anen.

20 Afamba God nandandepa Jisasa mogataga pris Dembinai, ina nanda'ana nosaho'ana dowaf, owa'atin. Anen na'i basef endilisifi atif naga'if banagafi ea' nandandepana. Amom pris fowa'imi ina nandandepam na'amba si'i anen,

\* 7:13: Jen 49:10; Ais 11:1; Mt 2:6; Re 5:5

\* 7:16: Hi 5:6

\* 7:18: Hi 9:9

owa'.\* <sup>21</sup> Apa' God na'i basef endilisifi atif naga'if banagafi ea' nanda' Jisas nataga pris dembinai. Anen nataga pris nemaf afamba God na'ipana naga'i,

“Dembinai na'i basef endilisifi atif naga'if banagafima anaf anen ina noho'ofa okom ananiami wapani, owa'atin. Ina' nepe pris dembinai dondol lifilafi.”\*

<sup>22</sup> God na'i basef ifimba naga'if banagafi. Isimba atis dei' Jisas nataga Dembinai kofagonama basef bu'wafi dambaifi God nagala' lapafi fikila' basef fowa' nali' nagala' lapafi. <sup>23</sup> Fowa' amom pris amom hiami. Dei' main, amom anaf mogaga'i ina la'ifima mogape atapim, owa'. <sup>24</sup> Apa' Jisas dei' nogape namona atapina dondol lifilafi. Isimba atis dei' a' nape pris Dembinai atapina.\* <sup>25</sup> Isimba atis dei' anen la'ifnai nofa' esis amam nematawa sogotanimai felefele'ma Goda agol ananigili, ma sogape andeande' lifilafi. Dei' main, anen nogape ambal lagapaona lifilafi nandabetena God nogatopalopas.\*

*Jisas pris Dembinai la'ifina endilisi ma nogatopalopapa*

<sup>26</sup> Pris Dembinai na'ambainai, la'ifina endilisi ma nogatopalopapa. Anen bo'ona hilili'i, waf awafi akana. Anen okom bu'wamunai, dei' nape laogona epes awasi sanda' waf awafii. God naso'ana agol lu'wagili nikila' ilif a' ilif a'owa'.\*

<sup>27</sup> Amom pris dembami fowa'imi mondolalima

---

\* **7:20:** Hi 5:6 \* **7:21:** Hi 8:6, 12:24 \* **7:24:** Ro 8:34 \* **7:25:** Hi 3:1 \* **7:26:** Hi 5:3



God nimaguf hiafi dondol. Magali' ata' mon-dolalimana ma nagakwaha waf awafi amamifi. Ama main, magi' mondolalimana ma nagakwaha waf awafi esis amam nematawai. Apa' Jisas ina nanda'as si'i amom, owa'atin. Anen nondolali ma God nemaf atetef dowafa waf awafi epes hi-asii ea' ma'um. Ama naso' anen atona nagafe'ma God.\* <sup>28</sup> Mu'uli inimba God nagaso' Mosesani nesaho' amam amamba owa' la'ifima monda' waf bu'wafi nimaguf dandaia ea' mape pris dem-bami. Apa' basef ifimba endilisifi atif God naga'if banagafi, ifimba fataga fagi'ma mu'uli inimbai, fandandepa Nogamana ananinai, anen nagataga bo'ona hilili' atapinai.

## 8

*Jisas nape pris Dembinai ipat Godi lu'unai endilisi gani heven*

<sup>1</sup> Basef ifimba anda'afi fape fagali'i, kofagefa na'amba. Apa' ea' anona pris Dembinai nape nagali'ma pris hiamii na'amba atin si'i basef fagali'i faga'iana. Anen nagape sia bu'wani Dembinaii wa'ol banagagoma felefele'ma lagol kwahisigilima gani heven.\* <sup>2</sup> Anen nahapila maol inimba nondolali ma God ipat lu'unai ananinai. Ipat anamba lotu'unai endilisinai. Anona aman ina nala' ipat anamba, owa'atin. Dembinai atona nasa'mana notawa.

<sup>3</sup> Fowa' God nandandepa amom pris dembami mofa' hiahawes fasisi gwa'aisi mafis sasisasi ma mondolalimana. Ea' Dembinai ape'inai wapani

---

\* **7:27:** Hi 5:1-2      \* **8:1:** Hi 1:3, 3:1; Hi 10:12, 12:2

nofa'i anis hiahawes nondolalimanasi. <sup>4</sup> I'i anen itapanai, anen ina dei' nope pris Dembinai, owa'. Dei' main, amom hiami ea' mape pris manda' maola mogofa'i hiahawes isimba hiasi mondolalima God, si'i mu'uli nagaso' Mosesani naga'ias. Apa' owa'atin, anen ina nape nanda' maol inimba itap apa'e, owa'.\* <sup>5</sup> Amom mahapila maol inimba mondolalima Godani manda' maol ipat ananinai fowa' sanda' lotuwana non-dola'waif dowafa ipat nani endilisinai hilili'i nagape heveni. Isimba atis afamba Moses na'i nogala' ipat anamba sogowalo' selanai, God na'ipana na'i, "Ina' solawaina ombal mondehena andeande'ma atiasi nenda' hiahaom hiami hi'ilam migi'mam mondahamam dindi'i dondo' endilisi si'i ametal inimba ae' igihimba'menam halafuta Sainai."\*

<sup>6</sup> Apa' owa', Jisas ea' nanda' maol inimba nondolalima Godani ea' maol inimba a' nikila'an endilisi maol amom pris fowa'imi manda'ani. Dei' main, anen nape la'afena Godi epes ananisi ma basef ifimba dambaifi God nala' lapef nagalomasafi. Ea' dei' basef ifimba dambaifi fikila' basef fowa'ifi God nala' lap nagaloma Mosesafi. Isimba atis dei' basef ifimba dambaifi fataga fawalapai basef bu'wafi endilisifi God nogowa'ef sisihifi fikila' fowa'ifi.

*Basef dambaifi God nala' lap nagalomapa afi fikila' basef endilisi fowa'ifi*

<sup>7</sup> I'i basef ifimba fowa' God nala' lap nagaloma Mosesafi fepe be'ef atapifai, dei' basef ifimba

---

\* **8:4:** Kl 2:17; Hi 9:23; Eks 25:40      \* **8:5:** Hi 7:22, 9:15

God nagala' lapafi fagafe'ma bifi, maol fenda'ani owa' anina. Apa' owa', owa'atin.\* 8 Owa' God nawalapa waf awafi epesi, ea' na'i,

“Ae' Dembiwai a'i, ‘Peme! Anaf anef nemaf atetef enda' anif basef dambaifi ela' lapef egaloma esis mini'ap wambota Israeli ma mini'ap Judai wapani. 9 Basef ifimba dambaifi ina fandahama ifimba anif fowa'ifi ala' lapef a'if agaloma esisi, owa'atin. Fowa' ala' lapa basef ifimba alomasa, afamba agahipa lagof asasi-gufi ma efa'as sakwaha itap lu'upa Isipi sagafe'. Apa' esis ina saila basef ifimba ala' lap agalomasafi, owa'atin. Ea' dei' andambema ewa'asa alafuga esis.’ Ae' Dembiwai aga'ias na'amba.\* 10 Anaf nimaguf ifimba hi'ilif, ama main, ae' enda' anif basef ela' lapef eloma mini'ap esis Israeli. Basef ifimba kofagefa na'amba. Anaf enda' mu'uli ae'ani nepe opalef asasilifi nomon, ea' enda'an nepe ukup asasi-pi nomon. Ea' epe God asasiwai, esis sope amam nematawa wambota ae'asi. 11 Anaf esis amam nematawa hiasi atona atin maol akasa sogawalipa esis alipisi asasisi sogaloma sahin owan asasisi siga'i, ‘Ipa' pendegawa Dembinai’, owa'atin. Dei' main, nogota atamba epes hiasi a' sogawa ae' ande-ande' hi'ilas, awasi sa'wisi soloma isimba ea' dambesi wapani.\* 12 Anaf ae' iti esis uwahipis ea' etopalopas dowaf sotanimai

---

\* 8:7: Jer 31:31-34    \* 8:9: Hi 10:16    \* 8:11: Hi 10:17

sope andeande', ea' ili'amona waf awafi esis sanda'afi.  
 Ea' waf afamba awafi asasifi anaf ae' ina ata' okom mondanda'maf wapani, a' owa'atin.”

<sup>13</sup> Basef ifimba dei' nagala' lapafi God nofales na'i basef ifimba dambaifi, fanda' ifimba fowa' nagala' lapafi dei' fataga apif ea'. Hiahawes sagataga apisi isimba sataga hages, ea' sope no-gota bandata ma higililas hi'igalas.

## 9

*Amom pris dembami fowa'imi maha mafis mofa'as saloma esimbel mondolali maso' God*

<sup>1</sup> Basef fagali'i God nagala' lapafi, anen nanda' anif basefa mu'uli na'ipasana anona ipat bo'ona hilili'i nogotawa itap apa'e ma sonda' lotuwanai.\* <sup>2</sup> Ipat anamba sanda' sel sanda'ana. Sawalagon biafigin wa'ol nape nagali'ii sofalagon sa'i, “Bo'wagoma hilili'i”. Hiahaom maga'oh anamba nomoni, amamba wanifim. Anona ileliwa wagataganai sanda' gol sanda'ami naloma anota belita magawamona bret mondolali magaso'anota Godi.\* <sup>3-4</sup> Apa' wa'ol lowaf alafugifa sowaolaf fetaol fawalagon figili'ama ganimba wa'ol momo'w nomone'wai, anamba sofalagon sa'i, “Bo'wagon hilili' a'owa'ma.” Hiahaom maga'oh na'amba nomoni amamba. Belita manda' gol manda'atai, pris mondolalima Goda hiahawes nogoh ambul

---

\* **9:1:** Eks 25:23-40; Eks 26:1-30 \* **9:2:** Eks 16:33; Eks 25:10-16; Eks 26:31-33; Eks 30:1-6; Nam 17:8-11; Diu 10:3-5

alogw fasigwi gwagasatai taloma anis bokis atitis basef God nagala' lapafi fagalasi. Bokis isimba sanda' gol sanda'asi ea' ande'esa si'isa gol atona. Bokis isimba nomonesa sala anol botol si'i malep sanda' gol sanda'api. Anis gwa'aisi esis Juda fowa' saga'as anamba wafigimai sofalas saga'i manai sala botol alamba nomon. Botol alamba lala bokis isimba laloma kalamuta Erani fowa' dahanamb kigalalamba soh hagatagambi. Saloma otamba biamba sagandombamba hilili'i ma God fowa' nanda' basef ifimba nala' lap nagaloma esis Judafi fagailami. Isimba sala bokis isimba nomon.\* <sup>5</sup> Apa' hiahaom magatoma ilifa bokis isimba ando'i amamba. Anom hiahaom biam si'i enseli sanda' gol mogolala'i sagandombami mondola'waifa God nalutu nagalomas. Amamba matoma ilifa bokis isimba. Bihinagof fandagiam malo'mamam na'amba lafel mondolali magakolo' esimbel bagali'amona okom wandafunai Godima. Apa' dei' ae' ina la'ifiwi ma iga'i basefa hiahaom amamba kofagema egenandonaef hi'igalef, owa'atin.\*

<sup>6</sup> Esis sanda' hiahaom mape alihima, nimaguf danda amom pris mawis ipat anamba nomon rum wa'am ando' mondolalimana.\* <sup>7</sup> Apa' ganimba nomon wa'ol nagape atina saga'i, "Bo'wagoma hilili' a' owa' ma", owa'. Anamba pris dembinai atona nape nagali'ma pris hiamii nafe' nagawis nemaf atetefa afagof danda. Apa' ina nafe' nawis dowadowaf, owa'atin. Anen

---

\* **9:3-4:** Eks 25:18-22    \* **9:5:** Nam 18:2-6    \* **9:6:** Eks 16:2-34

nofa' esimbel atembel mafisi nafe' nawis ganimba nomon nagape atina. Esimbel ambalemba nofa'ambela nondolalima Goda nogakwaha waf awafi ananifi ata' fili', ea' waf awafi esis amam nematawai wapani. Waf afamba esis owa' so-gawa andeande' sonda'afa.\* <sup>8</sup> Pris anamba nawis nanda' maol inimbai ma Ambal bu'unai Godi nigihimba'mapa na'amba. I'i ipat anamba nomon wa'ol nape nagali'ma ata' anin maol nepe ma sonda'anai, dao' ufia'w akwamba ma apa' mofe' mugawis ganimba saga'i, "Bo'wagoma hilili' a'owa'ma", akwamba ina kwataga kwan-dawalap alihi'w, ata' owa'.\* <sup>9</sup> Ipat anamba nihimba'mapa nogota ata'e dei'itai, nondola'waif nihimba'mapa basef na'amba. Dondol epes hiasa sanda' lotuma God sofa'ai hiahawes isimba fasifi gwa'aisi mafis sasisasi sondolali sagaso' Goda nogakwaha waf awafi asasifi. Apa' isimba ina la'ifisa sonda' malogof fagape opalef esis nomoni andeande'ma fegataga bo'walef endilisi, owa'atin.\* <sup>10</sup> Waf afamba sondolalimanafi kofagefa afamba. Waf saga' gwa'aisii embelafi faloma waf sa'ofaifi ma sotofa alogw awagwi sogataga be'esa naep Godi. Isimba hiahawes alop atopasi, God naso'as mu'uli inimba ma silan atapis sefe' sotagama nogota atamba nogaha'ofa hiahaom dambaimi.\*

*Krais naga' nondolali naso'ana esimbel anan-imbeli God*

---

\* **9:7:** Hi 10:19      \* **9:8:** Hi 10:1-2      \* **9:9:** Lev 11:2,25; Lev 15:18; Nam 19:11-13      \* **9:10:** Hi 3:1, 10:1

11 Dei' Kraisi nafi'i ea', nataga pris Dembinai nape nogali'ma pris fowa'imi hiamii. Ea' numafi hiahaom amamba mataga magape ea'i. Anen ea' nafe' nawis nomon endilisi ipat anamba agol lu'wagilinai, bu'winai endilisi nikila' ipat atamba selitai fowa'itai togotawa itap apa'ii. Apa' ipat anamba dei'inai ina notawa itap apa'e, epes sanda'ana sagala'ana lagof asasigufi, owa'atin.

12 Kraisi nawis nomon ipat anamba nafe' ganimba nomon nagape atina saga'i, "Bo'wagoma hilili' a'owa'ma". Anen nanda'am na'amba nemaf atetef, ea' ma'um. Apa' anen ina nofa' esimbel memem baloma bulmakaum nogami nawis ipat anamba, owa'atin. Anen nawis nondolalima Goda esimbeli alop ananisi atis si'is, ea' ma'wis isimba atis. Anen nanda'am na'amba natala apa' natagwahepama waf awafi fagawasi'apai ma mogape andeande' dondol lifilafi.\* 13 Nemaf mamahefa anis epes alogw gwailasa naep Godi, amom pris maha bulmakau suwafumi maofam mofa' esimbel amamibeli baloma agamb na'ol bulmakau numa'inai maga'atonai. Ea' mowali'masam epes isimba. Manda'as na'amba epes isimbai sataga bo'wesa alop atop ando'a naep Godi.\* 14 Apa' esimbel Kraisi bikila' isimba a'owa'. Kraisi ina nanda' anef waf awafi, owa'atin endilisi. Ambal bu'unai Godi nagape namona dondol lifilafii natopalopana ma nondolalima God naso'ana anen atona hi'agalana. Isimba atis dei' esimbel ananimbeli ina bandombasa alop atop ape'ipi ando', owa'. Ambalemba ban-

\* **9:12:** Lev 16:3,14-16; Hi 10:4; Nam 19:9,17-19      \* **9:13:** 1 Pi 1:18-19; 1 Jo 1:7; Hi 6:1

dombasa malogof fagape opalef ape'ilifi nomoni bo'walef hilili' pelele' a'owa' ea' bakwaha waf naninani wafinai ma apa' dei' mugahapila maol God nagape namunai.\*

*Esimbel Kraisi bewa' banaga basef dambaifi God nagala' lapafi*

<sup>15</sup> Isimba atis dei' Kraisi nape la'afen numafi basef ifimba dambaifi God nagala' lapafi. Anen naga' ea' ma natala esis amam nematawa no-gatagwahisa waf awafi esis sanda'afi nogota atamba sagape lafela basef God nali' nagala' lapafi. Ea' dei' amam nematawa mamahisa nogo-falasi ma sagagi'manai, esis sofa' ambal alamba namili sogape andeande' lifilafi dondol. Amamba ambal namili si'i fowa' God naga'i endilisi atisa sogofa'ami.

<sup>16</sup> Epen mamahina okom mondanda' niga'i basef ifimba banagafi ma epes mamahisa anaf-sogofa' hiahawes ananisii afamba anin nigaga'afi, nanda' basef ifimba lapafi fail anop okwatip. Ama nogamana ananinai ni'i nigaila basef ifimba ma nogofa' hiahawes ahamanai, dao' anen nili' nindihimba'mas endilisi ma ahamana ananinai naga' ea'. <sup>17</sup> Dei' main, i'i ahamana nogaga', basef ananifi lapafi nanda'ef fagape okwatipi fape b-nagef fandawalap. Apa' i'i anen ata' nogape namona, basef ifimba ina dei' banagef, owa'. Ata' pupulif. <sup>18</sup> Isimba atis basef ifimba fowa' God nagala' lapafi owa' fetaga fendawalap dowafa. Amom maha mafis makolo' esimbel amamimbeli bewa' banaga basef ifimba, dao' fape banagef

---

\* **9:14:** 1 Ti 2:5; Hi 8:6



fundawalap alihif.\* 19 Moses fowa' nali' na'ipa esis amam nematawa Juda hiasi basef hiafi ma mu'uli Godi hi'alef, ama main, nofa' esimbel bulmakau nogami baloma memei baloma embel baloma awif sipsipif akwahimi maloma lawag sa'uni saga'i hisopi agufugama nalam dis esimbel ambalemba bagalasi nuwali'ambela amam nematawa isimba hiasi saloma buk akwamba mu'uli inimba Godi nagapau'wi wapani.\* 20 Ea' na'i, “Esimbel ambalemba begewa' banaga basef ifimba God nagala' lapafi, ifimba na'ipipaefa pigailifi.”\*

21 Moses nowali' esimbel na'amba atin bail ipat anamba sanda' lotuwanai naloma hiahaom amamba hiami hi'alam sanda'am sanda' lotumanam God ipat anamba nomoni.\* 22 Basef ifimba ma mu'uli inimba fa'i felefele'ma hiahawes isimba hiasi hi'igalas a' mosa'opas esimbel atembela sogataga bo'wes hilili'. Apa' i'i esimbel owa' biliwia, God ina nokwaha waf awafi epes sanda'afi, owa'atin endilisi.\*

*Krais nondolalima anen atona nali'amona waf awafi epesi*

23 Ipat anamba naloma hiahaom amamba sondolali sanda' lotuma Godami, amamba nondola'waifa hiahaom amamba endilisimi magape heveni. Mu'uli Godi na'i hiahaom amamba itapami motaga bo'om hilili'ma esimbel ambalemba atembel. Apa' hiahaom amamba

---

\* 9:18: Eks 24:3,6-8; Lev 14:4,6      \* 9:19: Eks 24:8      \* 9:20:  
Lev 8:15,19      \* 9:21: Lev 17:11; Ef 1:7      \* 9:22: Hi 8:5, 10:1

endilisimi magape ilifi mikila' amamba ita-pami. Isimba atis dei' God na'i hiahaom amamba endilisimi magape ilifi a' mondataga bo'om hilili'ma esimbel dambaimbeli bigikila' esimbel fowa'imbeli.\* <sup>24</sup> Apa' Kraisi ina nawis ipat anamba Godi epes sagala'ana lagufi, nondola'waifa ipat anamba endilisinai nagape ilifi, owa'atin. Anen nafe' nawis heven atogon, anamba dei' nataga alihina nape atapina ma naep Godi nandabeten nagatopalopapa.

<sup>25</sup> Nema'f atetef afagof danda pris dembinai nape nagali'ma pris hiamii itap apa'e nofa' esimbel mafisi nawis nomon nondolali ma God. Nawis nomon ganimba wa'ol nagape atina saga'i bo'wagon a'owa'ma. Esimbel ambalemba ina' a' ananimbeli ma alop ananipi, owa'. Apa' Jisas ina nawis nomon naso' anen atona nondolalima God afagof danda si'i amom pris manda'am, owa'atin. <sup>26</sup> I'i anen nonda'am na'ambaiai, anen a' nofa' akafimi nimaguf hiafi timbi tambel fowa' dambadamba God nanda' itap apa'e nifi'i notaga dei'. Apa' owa'atin. Apa' dei' felefele'ma nogota ahi'igalata Kraisi nataga itap apa'e ma nagaso'ana anen hi'agalana nondolalima Goda nogokwaha waf awafi apa' epesi. Nanda'am nema'f atetef ea' ma'um.\* <sup>27</sup> Epes hiasi hi'ilas anaf sogala' atetef owagama sulutama basef lu'wafi God nonda' kotimasafi. <sup>28</sup> Ea' na'amba atin si'i Kraisi naso'ana anen hi'agalana nondolalima Goda nema'f atetef nagakwaha waf awafi epes hiasii. Anaf wapani nigil' notambel nifi'i. Apa' anen ina nifi'i ma

---

\* 9:23: 1 Jo 2:1      \* 9:26: Fl 3:20; Hi 10:10; 1 Pi 2:24

nogakwaha waf awafi, owa'. Nifi'i ma nogofa' epes isimba sape sogohafanai.

## 10

*Hiahawes gwa'aisi mafis mais apisi mondolalima God magaso'anasi, isimba ina a' la'ifisa sogakwaha waf awafi, owa'atin*

<sup>1</sup> Apa' mati mu'uli God nagaso' Mosesani nondola'waif dowafa hiahaom bu'wami ma'i anaf migi' mogatagai. Hiahawes isimba apisi ina endilisi, owa'. Isimba sondola'waif dowafi. Ea' dei' mu'uli inimba na'i esis ata' sondolalima God afagof danda ani, ina la'ifina nisindi'amona esis sogafi'i felefele'ma God sondagalamana ma sogataga bo'wes endilisi, owa'atin.\* <sup>2</sup> I'i mu'uli inimba nenda'as be'es endilisiai, dei' ina ata' sondolalima God wapani, owa'. Apa' owa', owa'atin. I'i esis sifi'i sonda' lotumana asotaga be'es sondolalimana atinai, malogof fagape opalef esis nomoni ina fihimba'masa waf awafi asasifi, owa'. Apa' owa', owa'atin. <sup>3</sup> Afagof hiagufi danda hiahawes mafis mais sondolalima Godasi sagasa'ma ukup asasipi ma sogogawa waf awafi asasifi atapif fapomas.\* <sup>4</sup> Esimbel bulmakau noganai baloma memei ina la'ifima mogakwaha waf awafi esis sanda'afi, owa'atin endilisi.\* <sup>5</sup> Ea' afamba Kraisi nagafi'i itap apa'e anen na'ipa God na'i,  
 “Ina' nandaiwa'ma esis soha mafis sofa'ai hiahawes mais sifi'i sondolalima ina', owa'. Apa' ina' nandondomba anop

\* **10:1:** Hi 8:5    \* **10:3:** Hi 9:13    \* **10:4:** Sam 40:6-8

alopa negase'ea'p ae'. <sup>6</sup> Mafis saham saga'atama sondolalima ine'ami maloma hiahawes mafis mais sondolalimamenasi ma negakwaha waf awafii, amambai ina' nandaiwa'mam. <sup>7</sup> A'i owa' main a'i, 'God, ina' dei' netolowe. Si'i fowa' amom profet manda' basef fail buk faga'iasa ae', dei' ea' afi'i ma igaila okom ine'imi atom.' ”

<sup>8</sup> Krai nali' ata' na'ipa God na'i, “Ina' nandaiwa'ma mafis mais saham sanda'am sandolalima ina' belita sondolalima ine'atai. Mafis maim amamba sondolalima ine'mami ma negakwaha waf awafii, amambai ina' nandaiwa'mam.”

Apa' owa' mu'uli God nagaso' Mosesani na'i esis sondolalimana atin sondape atapis. <sup>9</sup> A'i owa' main, Krai nagi' na'ipa God na'i, “Ina' natolowe. Ae' afi'i ma igaila okom ine'imi atom.”

Ea' dei' God natofa mafis maim fowa'imi magali'i sondolalimaminami. Apa' dei' nahapona waf afamba Krai nagaila okom Godi atom fape banagef faha'ofa amamba fowa'imi.\* <sup>10</sup> Jisas Krai naila okom Godi hi'alam datima naso'ana alop ananipi nondolalimana nemaf atetef ea' ma'um. Isimba atis dei' nanda'apa mataga ananipai atepa be'epa hilili'.\*

<sup>11</sup> Amom pris hiami hi'alam malutu manda' maol nimaguf hiafi danda. Amom mondolali ma God ea' manda' inimba atin nimaguf hiafi timbi tambel. Apa' owa' ofa inimba ina bagen nakwaha waf awafi, owa'atin. <sup>12</sup> Apa' aman anamba nondolali atetef, nagaso'ana anen

---

\* **10:9:** Hi 9:12,28      \* **10:10:** Eks 29:38

atona nondolalima Goda nagakwaha waf awafi, amamba atom atapim mope dondol lifilafi. Anen nanda'am na'amba ma ea', dei' nape naloma Goda wa'ol lagol kwahisigili banagagili.\*

<sup>13</sup> Anen nape na'amba atapina nape nasasa nemaf afamba God nonda' bousi ananisi sogafe' lafela anen. <sup>14</sup> Dei' main, Krais naso'ana alop ananipi atop God nondolalimana nemaf atetef, ea' amamba atom nanda' epes sataga bo'wes hilili' sogape dondol lifilafi. Epes isimba anen dei' nape atapina nanda'as anaf sogataga bo'wes hilili'.

<sup>15</sup> Ea' Ambal bu'unai Godi wapani nawalapa basefa apa' na'amba nali' na'i,\*

<sup>16</sup> “Dembina na'i, nogota atamba ata' hi'ilata tili', ma main dao', ae' enda' anif basef lapafi elomas.

Basef ifimba na'amba. Anaf atiasi ae' a' enda' mu'uli ae'ani hiani nepe nelelemb asasilimbi ea' enda'an nil ukup asasipi.”\*

<sup>17</sup> Ama main nagi' nowatani basef ifimba na'i, “Ae' dei' ina atiasi mondanda'ma awami asasimi moloma waf awafi esis sanda'afi, a' owa'atin.”

<sup>18</sup> God nokakisa waf awafi nakwahaf ea'. Dei' maol inimba sofa'ai mafis mais sondolali ma Goda waf awafi a' owa'atin endilisi.\*

*Apa' mohapifana endilisi mondafe' felefele'ma God*

<sup>19</sup> Ea' dei' ipa' alipipai, esimbel Jisasi atembel dei' apa' ukup banagep. Ea' owa' ombel mohapa ma mofe' mugawis nomon anamba God nagapoma bo'wagoma hilili' a'owa'ma.\* <sup>20</sup> Apa'

\* **10:12:** Hi 1:3; Sam 110:1      \* **10:15:** Jer 31:33; Hi 8:10

\* **10:16:** Jer 31:34; Hi 8:12      \* **10:18:** Hi 4:16      \* **10:19:** Mt 27:51; Hi 9:8

dei' ilama mofe' mugawis anamba ufia'w akwamba dambai'wi ambal namili'wi. Ufia'w akwamba Jisas atona nawala lowaf anamba lu'unai nogotaol si'i utai nandogwa'w kwagal nawis nomon. Lowaf anamba alop ananipi atop. <sup>21</sup> Dei' apa' anona pris dembinai nugumafi amam nematawa Godii. Anamba Jisas atona.\* <sup>22</sup> Isimba atis dei' apa' mondafefelefele'ma Goda waf afamba. Apa' mondakwaha waf hiafi baso'afi ma opalef ape'ilifi ea' mohapifana endilisi. Ukup pendapoma Krai, anen nuwali' esimbel anan-imbeli nelelemb ape'ilimbi ma nogandombaselemb. Malogof fagape opalef ape'ilifi nomoni ina fihimba'mapa fawalogapa ma waf awafi ape'ifi, owa'. Apa' ukup pendapoma anen a' nasa'opa alop ape'ipi embel kalagembeli.\* <sup>23</sup> Apa' mondahapila hapif ape'ini mundawalapan alihina hiahaom fasimi apa' mape mogohafami. Isimba apa' mondahapilas sisihis, ea' ina mondahagas, owa'i. Dei' main, apa' ea' mogawa, hiahawes mamahisa God naga'i basef endilisifi atifi atiasi nigimif nonda'as datima. <sup>24</sup> Apa' mondasa'ma ukup esis sahin owani, ma ukup pigapigaila esis amam nematawa sonda' waf fasifi.\* <sup>25</sup> Apa' ina ukup pese'apama waf mondakolas mogaloma esis alipisi si'i anis epes sanda'as, owa'i. Apa' mondowa' banagama atin ea' mondanda'as atin atapis mindikila' fowa' manda'as. Dei' main, ipa' ea' pegawa nemaf Dembinai nogafi'afii a' fafi'i felefele'.

---

\* **10:21:** Lev 8:30; Esi 36:25; Ef 5:26 \* **10:22:** Hi 4:14 \* **10:24:** Hi 3:13 \* **10:25:** Hi 6:4-8

*Apa' ina mowa' alafugaha nogamana Godi, owa'i*

<sup>26</sup> I'i apa' mogawa basef endilisifi ea' ma dei' apa' mila ukup ape'ipi atipa mofe' monda' waf awafi atapipamaf, i'i monda'as na'amba, ina atiasi a' anin ofa daiana negakwaha waf awafi ape'ifi, owa'atin endilisi.\* <sup>27</sup> Atiasi apa' ombel mohapa a'owa' endilisi mope mosasa nemaf afamba God nogawaloga apa' ma nosapa'apa mogafe' nif amamba lu'wami a wandafum a'owa'i moga' bousi isimba Godi.\* <sup>28</sup> Apa' ea' mogawa, epen mamahina nimbisila' mu'uli inimba God nagaso' Mosesani, ma epes bias a'a wanis sitilina sowalapa waf awafi anin nanda'afi, esis ina atiasi siti anin uwahipin, owa'atin. Esis ea' sola'apan sohan negaga'.\* <sup>29</sup> Dei' ipa' ukup pandame' pa'imama ma epes mamahisa sogowa' alafugaha Nogamana Godi? Epes isimba atiasi sofa' nimanimi lu'wami a'owa' mikila' epen inimba nigimbisila' mu'uli inimba God nagaso' Mosesani. Esimbel Kraisi anol ametala basef God nagala' lapafi fanda' epes isimba ananisi atis bo'wes hilili'i. Owa' epes isimba sanda'as na'amba sa'i esimbel ambalemba Kraisi falafimbeli dowaf, sa'i ga' Kraisi falafini atin. Ea' sanda' basef findiwaefa Ambal bu'unai Godi natopalopapa dowaf nugumafiapai.\* <sup>30</sup> Dei' main, apa' ea' mogawa epen inimba a' na'i, "Waf pegagwa waf awafiafi, maol ae'ani. Ae' atowe bola egwamasaf." Ea' na'ias wapani na'i, "Ae' atowe Dembiwai anaf

\* **10:26:** Ais 26:11      \* **10:27:** Diu 17:6, 19:15      \* **10:28:** Eks 24:8; Hi 13:20      \* **10:29:** Ro 12:19; Diu 32:36; Sam 135:14

ewawaloga esis amam nematawa ae'asi ma kot basef lu'wafi.”

<sup>31</sup> I'i God banagona nagape namona atapinai nogahapila apa' tatala'ipa ma nogagwamapa waf awafi, amambai dei' ombal lu'wami endilisi mo-gahepamam kwapati'i.

*Apa' mundalutu banagepama hapif*

<sup>32</sup> Apa' ipa' ukup pendapoma nogata fowa', afamba ipa' pegefa' mogogala'i Godi. Nogota atamba ipa' pefa' nimanimi akafimi lu'wami a'owa'. Owa' owa'atin. Palutu banagepa ma pagali'amona wandafa waf awafi.\* <sup>33</sup> Anif nimaguf sanda'epa palutu naep amam nematawa la'afisa, ea' sanda' basef awafi findiwaefa ipa', sase'epa akafimi nimanimi atom naep asasipi. Ea' anif nimaguf sanda'as na'amba atina anis amam nematawa daias. Ipa' palutu palomas patopalopas.\*

<sup>34</sup> Ipa' pati esis amam nematawa sagape kalabusi uwahipis pefa' akafimi palomas. Ea' nemaf afamba esis salolo' lagofapa sofa'mepa hiahaom ipe'imi, ipa' sonahepa ma batap tol pagapomas. Dei' main, ipa' ea' pegawa, hiahaom ipe'imi bu'wami endilisi ata' mapomepa amamba anaf mogape atapim dondoli. Amamba mikila' endilisi hiahaom amamba sogofa'mepami.

<sup>35</sup> Ea' dei' ipa' ina pekwaha waf bu'wafi ukup pagalutu banagepamafi, owa'i. Waf bu'wafi ea' afamba atef, God anaf nogwamepa hiahaom fasimi ma ipa'.\* <sup>36</sup> Ipa' pindalutu banagepa ma pigaila okom Godi ma pegefa' hiahaom

\* **10:32:** 1 Ko 4:9

\* **10:33:** Mt 6:20; Mt 19:21,29

\* **10:35:**

Lu 21:19; Hi 6:12



fasimi fowa' God a' na'iam ea' endilisi ma nogasi'ipami.\*

<sup>37</sup> Aho', ina ata' nogota laota. Nogota kwasala'uta dowaf, “Ama aman anamba na'i nogafi'i, anen atiasi a' nifi'i. Anen ina atiasi nupani halehale, owa'atin.\* <sup>38</sup> Apa' epes fasisi ae'asi kofagema ma sogape namis atapis na'amba. Esis sahapifa ae'. Epen mamahina nendahagasa nekwaha negahapifa ae'i, atiasi okom ae'ami ina bo'oma anin, owa'atin.”

<sup>39</sup> Apa' ina epes ombel mahapa mandahagas makwaha magahapifa God ama atiasi higilgalapa lamonapai, owa'atin. Apa' epes magahapifanai mofa' ambal namili mogape andeande'i.

## 11

### *Waf kofagefa ma mogohapifa God*

<sup>1</sup> Waf kofagefa ma apa' mogohapifa God na'amba. Nelelemb ape'ilimbi ea' bahapila hiahawes isimba apa' mahapifana mape mogohafasa anaf sigi' sogotagai soloma anom hiahaom anaf God nogaso'apami. Ea' hiahawes isimba naep ape'ipi owa' mogatilisia, apa' nelelemb ape'ilimbi begawa endilisi hiahawes isimba sape.\* <sup>2</sup> Amom fowa'imi mahapifana na'amba, isimba atis dei' God na'iam na'i, “Waf amamifi bu'wafi.”\*

---

\* **10:36:** Hab 2:3-4      \* **10:37:** Ro 1:17; Ga 3:11      \* **11:1:** Ro 4:18; 2 Ko 5:7      \* **11:2:** Jen 1:1; Sam 33:6; 2 Pi 3:5

<sup>3</sup> Apa' mahapifana, isimba atis dei' mogawa God nanda' hiahaom magape ilif itapi matagama basef ananifi atif. Ea' apa' mogawa hiahaom hiami apa' ea' magatulumi, amamba God nanda'ama hiahaom amamba apa' owa' mogatolom naepia.\*

*Waf Abeli Enoki Noa magahapifa God*

<sup>4</sup> Abel nahapifa God. Isimba atis dei' nofa'i anis hiahawes nondolalima Godasi be'es endilisi sikila' hiahawes Kain nondolalima Godasi. Aho', Abel nahapifa God, ea' amamba atom God na'i anen epen bo'ona hilili'i. God na'i aho'ma hiahawes Abel nondolalimanasi na'i hiahawes isimba fasis. Abel naga' ea', apa' waf ananifi nagahapifa Godafi si'i malogol ata' fihimba'mapa waf bu'wafi atapina nape.\*

<sup>5</sup> Enok nahapifa God ea' dei' God nofa'ana nafe' nalota heven. Anen ina nape naga', owa'atin. Epes sala solaomana sa'i sogati anini, apa' ina satolona, owa'. Dei' main, God nofa'ana. Isimba na'amba atin si'i buk Baibel naga'ias na'i,

“Fowa' God ata' owa' nofa'anaia, nogota atamba Enok nali' naila okom Godi.”

<sup>6</sup> Epes owa' sogahapifa Godia, esis ina atiasi sila okom Godi, owa'atin. Dei' main, i'i epes ami si'i sogafe' felefele'ma Godi, esis sohapifa God sondogawa endilisi anen nagape namona atapinai. Ea' sohapifana ma nogaso'as hiahaom bu'wami epes isimba sala sogolaomana banagambili.\*

---

\* **11:3:** Jen 4:3-10    \* **11:4:** Jen 5:24    \* **11:6:** Jen 6:13-22; Jen 7:1; 1 Pi 3:20; Ro 3:22, 4:13

7 Noa nahapifa God dei' nihimba'mana basefa hiahaom anaf migi' mogatagai, hiahaom amamba anen owa' ata' notolom nogogawamia. Anen nail basef Godi nanda' ano'w galaho'w lu'wakwi. Galaho'w akwamba Noa nao'wa ako'w awasi ananisi safe' sawis sagapau'wi sape andeande', ina awes, owa'. Anen nahapifa God. Isimba atis si'i nanda' kotima esis amam nematawa sagape itapi hi'alas. Anen nahapifa God. Isimba atis ea' nofalana na'i aman bo'ona hilili'i, si'i nanda'masas epes isimba hiasi mamahisa sagahapifa anini.\*

### *Abraham*

8 Afamba God nofala Abraham nokwaha wambel ananimbili nogafe' itap anaf anen na'i nogaso'anapi anen nahapifana. Isimba atis nail basef Godi nafe'. Anen ina nogawa anamba nogafe'ma, owa'. Apa' anen nahapifana atin dei' nafe'.\* 9 Anen nahapifana ea' nafe' nape itap apamba fowa' God na'i endilisi atis na'i nogaso'anapi. Anen nape itap apamba si'i anen anota wambotai. Nape ifagw seligwi naloma Aisaki Jekop, amom biam anaf mogofa' itap apamba mogalomanai, si'i fowa' God nali' naga'i basef ifimba lapafi. 10 Dondol Abraham okom ma'i ata' niti wambel taun inimba pohawa mais banagasini wambel banagambili gani ilif. God atona gawainai anen okom mandanda'ma nonda' wambel ambalemba, ea' nanda'ambel.\*

---

\* **11:7:** Jen 12:1-5; Ap 7:2-4      \* **11:8:** Jen 26:3; Jen 35:12,17

\* **11:10:** Jen 18:11-14; Jen 21:2

11 Sera ako'w asa'w ea' ina kola awasi, owa'atin. Nogota kogola awasiatai ea' tafe' hi'alata. Apa' owa' ako'w kwahapifa God. Isimba atis dei' God nanda'akw banage'wa kogola awani. Dei' main, ako'w kwahapifana endilisi ma basef anen nagala' lapafi, kwa'li anen atiasi nigi'mif nonda'as datima si'i naga'if.\* 12 Ea' dei' aman anamba atotona, anen ea' hagona felefele'ma nogaga', ea' nataga ahama awasi afe'usi hiasi a'owa' anaf sigi' sogatagai. Esis sataga hias a'owa', sondahama ondowa wagape ilifi, waloma ko'onaga goga'oh naoh akatai. Epes ina la'ifisa sigiambas, owa'atin.\*

13 Epes isimba sahapifa God atapisa sape safe'ma sagaga'li. Ina sali' sofa' hiahaom fasimi amamba God na'li endilisi nogaso'asami, nemaf afamba sagape, ata' owa'atin. Esis sahapifana endilisi salutu laogon sandagalam si'i sagatolom ea'li. Ea' sawalapa basef sa'if sa'li, "Apa' mape itap apa'e si'i epes analemb walimbi. Apa' mafi'li mape nogota bandata itap apa'e."

14 Epes saga'li basef ifimbaii, apa' ea' mo-gawas, sa'li sowando'ma itap asasipi si'lip. 15 I'i ukup asasipi ata' pape pandanda'ma wambel ambalemba fowa' sakwahembel sagafi'iai, dei' esis ata' ufiaw kwagala sotambel sogafe'agon.\*

16 Apa' dei' esis ina sanda'as na'amba, owa'atin. Nelelemb asasilimbi behafema anep itap da-iap, fasifasip a'owa' pikila' anamba fowa'igima.

---

\* 11:11: Ro 4:19; Jen 15:5, 22:17; Diu 10:22 \* 11:12: Jen 23:4; 1 Kro 29:15; Sam 39:12; 1 Pi 2:11 \* 11:15: Eks 3:6,15; Mk 12:26

Anamba anen heven atogon. Isimba atis dei' God ina ambal aola epes isimba saga'i, "Ina' God apa' manda' lotuminai," owa'atin.

Anen nandomba anambel wambel taun ea' ma epes isimba sagahapifanai sofe' sogapaogon.\*

<sup>17</sup> Abraham nahapifa God a'owa' ma basef ifimba nala' lapef nagalomanaefi. Ea' dei' God nagwamba Ebrahama nogaso'ana Aisak nondolalimana ma God. Endilisi, Abraham nape nasasama noha nogamana ananinai nondolalimana. <sup>18</sup> Apa' owa' God nali' na'ipana na'i, "Esis wambota Aisaki atis anaf sofa' agol wambota ine'isi."\*

<sup>19</sup> Abraham okom mandanda' na'amba na'i, "I'i ae' egahana afunama, ea' hapainai, bola God nogasa'mana wapanii."

Ea' dei' apa' mi'ias mi'i isimba si'i God nasa'ma Aisak notambel nosafili matmat wapani ma Abraham notambel nogofa'ana."\*

### *Aisaki Jekop maloma Josep*

<sup>20</sup> Aisak nahapifa God. Isimba atis dei' nofalo'ma Jekopi Iso nowa' banagama hiahaom fasimi na'i anaf mogatagamai.\*

<sup>21</sup> Jekop nahapifa God, ea' dei' afamba felefele'ma na'i nogaga', nofalo'ma nogaopana Josepi biam nowa' banagam. Anen nandahi'amon nasisil nindiwa balaga nandagalama God.\*

\* **11:16:** Jen 22:1-14; Ro 9:7; Je 2:21-22      \* **11:18:** Ro 4:17

\* **11:19:** Jen 27:27-29; Jen 27:39-40      \* **11:20:** Jen 48:15-16

\* **11:21:** Jen 50:24-25; Eks 13:19

<sup>22</sup> Josep nahapifa God. Isimba atis dei' fele-fele'ma na'i nogaga' anen na'i basefa anaf esis Israel sokwaha itap lu'upa Isip sogafe'. Ea' na'ipasa sogawa bihitagof alop ananisi wandof.\*

### *Moses*

<sup>23</sup> Mamasana Mosesi sahapifa God. Isimba atis dei' ma'mana kolana ea' sambaho'wana atin nape aomb wanemb. Dei' main, esis bias satolona fasifasina a'owa' endilisi. Esis ina ombal mahasa King dembinai Fero ma mu'uli ananini, owa'.\*

<sup>24</sup> Ama main, Moses nataga dambena, nahapifa God. Isimba atis dei' okom mandanda' nandaiwa'ma esis sofalana sigali' nogama nemata'w akwamba King Fero nogamana, owa'.

<sup>25</sup> Na'i nondofa' nimanimi na'amba atin nondaloma esis wambota atota Godi. Nandaiwa'ma nogaila waf awafi ma nope nondagala nogota atamba bandata.\* <sup>26</sup> Anen okom mandanda' ma'i i'i anen nogofa' ambal awali ma agol Kraisi, amambai a' fasimi endilisi mikila' moni hiani naloma sosaf fasinai hiana haona esis Isipi. Dei' main, anen okom mapoma hiahaom amamba fasimi a'owa' anaf God na'i endilisi nogaso'anami.\*

<sup>27</sup> Moses nahapifa God. Isimba atis dei' nohafel nakwaha itap lu'upa Isip. Anen ina nandafa'ma okom wandafunai King Feroi, owa'atin. Anen si'i nagati aman anamba esis owa' la'ifisa sogatolona naep asasipia. Ea' dei' nape banagona.\* <sup>28</sup> Anen

---

\* **11:22:** Eks 1:22, 2:2      \* **11:23:** Eks 2:10-12      \* **11:25:** Hi 10:34-35      \* **11:26:** Eks 12:51; Eks 14:13,14; Ro 1:20; 1 Ti 1:17; Hi 11:1      \* **11:27:** Eks 12:21-30

nahapifa God dei' naila basef ananifi ma gwa'aisi isimba lu'wasi Pasova, naha sipsip nanda' lo-tuma God. Ea' nuwati' esimbil bail utagw ilifa wa'owa'ol afamba ensel anamba nogaha awasi amam esis Isipi ina atiasi noha esis Israeli, owa'.\*

*Esis Israel hiasi a'owa' sahapifa God banages*

<sup>29</sup> Esis Israel sahapifa God. Isimba atis dei' satopa' naoh agiligwa Embel Akwahimi mandahagas momba' monafa ea' safe' akata si'i itap fatauguma. Ea' esis Isip sati esis salutu la'afen, sagi'mas safe' owa' embel betanima bandahapima baofanas ea' bahas saga' lamonas hi'alas.\*

<sup>30</sup> Esis Israel sahapifa God, isimba atis dei' safe' sanogama indalelemba sanda' otamba sanda'ami wambel Jeriko tulif sail wik si'igai, nimaguf 7-pelaif, ea' indalelemb ambalemba guligatam mowa itap.\*

<sup>31</sup> Nemata'w akwamba kwanda' so'a waola amami Rahap, ako'w kwahapifa God. Isimba atis dei' amam biam mandambaho' mafi'i magatologini kumafiam andeande'. Ea' dei' ako'w ina afu'w kwaloma epes isimba wambelisi sogosambala Godii, owa'atin.

<sup>32</sup> Apa' dei' ae' ata' iwatani basef mamahifa wapani? Owa'atin. Nogota ina laota ma ata' iga'i basefa Gideon, Barak, Samson, Jepta, Devit naloma Samyuel maloma amom profet, owa'.\*

<sup>33</sup> Amom amamba, magahapifa Godi. Isimba

---

\* **11:28:** Eks 14:21-31      \* **11:29:** Jos 6:12-21      \* **11:30:** Jos 2:1-21; Jos 6:21-25; Je 2:25      \* **11:32:** Dan 6:22

atis dei' malutu banagem mikila' wandaf mata-logofa soldia amom king dembami hiamii. Mape dembami mumafiasa waf usi'ifi ea' mofa' hiahaom bu'wami God na'i nogaso'amami. Ea' masopama malogofa mafis amamba laion wanda-fumi lu'wami.\* <sup>34</sup> Ea' mahefa nif lu'wafi faganda'ef. Amom mafa' mafe'ma bainagw mindihi'amam ea' ina mapisilam, owa'. Amom mape pupulim ama main, owa' mofa' banagami. Ea' mataga banagem endilisi ma wandaf matofa amom soldia hiami misi'ah esis anota wambotai.\* <sup>35</sup> Anom amam ea' magaga'i motambel mosafel wapani, mamamam amamuwai watolom wao'wam. Anis epes sanda' kalabus ea' esis bousi sahambombaga alop asasipi endilisi a'owa', felefele'ma sogaga'. I'i esis sigaila basef asasifima, bola sokwahis sefe' wahifis. Apa' owa', esis ina saila basef asasifi, owa'atin. Esis ukup papoma anaf sotanima sogosafel matmata sogofa' ambal namili, na'ambai andeande' a'owa'.\* <sup>36</sup> Anis sofa' nimanimi ma esis bousi sa'i basef findiwaifi ma esis, sahas kwapete'as. Ea' anis, sowa'as sen sanda'as sape sanda' kalabus.\* <sup>37</sup> Anis, bousi sakwaha otamba sahas afis. Ea' anis, sanda'as kwapete'as endilisi. Anis sofa' so satopa'as alop asasipi biafis atis. Ea' anis, sahas bainatagw saga'.

Ea' anis sagahapila Godi sowaho' alop mafis sipsipi memei si'i luwaguf safe'. Esis a' hiahawes hiasi akasa alop asasipi. Ea' bousi sanda'mas

\* **11:33:** Dan 3:23-27      \* **11:34:** 1 Kin 17:17-24; 2 Kin 4:18-37

\* **11:35:** 1 Kin 22:24-27; Jer 20:2, 37:15; Jer 38:6      \* **11:36:** 2 Kro 24:21



waf awafi endilisi saso'as nimanimi. <sup>38</sup> Ea' dei' safa' safe' ganigani sandambaho' itap wafigima epes akagoma. Anis sandambaho' halafutagw, anis sandambaho' otamba lu'wami magal magawis nomoni, a itap fagagatagoma. Esis amam nematawa fasifasis a'owa'i. Isimba atis dei' epes itapasi ina bo'wesa sope sogalomas, owa'atin.

<sup>39</sup> Epes isimba hiasi hi'alas sagahapifa Godi. Isimba atis dei' sofa' agof fasigufi ma naep ananipi. Apa' esis ina dei' sofa' hiahaom amamba fasimi fowa' God na'iam ea' na'i endilisi nogaso'asami, ata' owa'atin. <sup>40</sup> Dei' main, fowa' gani God okom mandanda' nandondomba anom hiahaom fasimi a'owa' ma apa'. Hiahaom amamba mikila' hiahawes esis fowa'isi sagahapifanai sa'i sogofa'asi. God nanda'am na'amba ma anaf esis sotaga be'es endilisi sofa'am sogalomapa.

## 12

### *Apa' miti Jisas naep do' pilana ea' mohapifana*

<sup>1</sup> Dei' apa' si'i main? Esis epes fowa'isi sagahapifa Godi salutu salipapa si'i ilagw lu'wami maso'alepa magala'ambemapa sihimba'mapa waf sagahapifanafi. Isimba atis apa' dei' mondakwaha hiahaom amamba manda' apa' nimanipai, moloma waf hiafi awafi fagawasi'apai. Ea' mondowa' banaga nelelemb ape'ilimbi ma mosagih banagambel mondololai'ma sagih bu'wani inimba God nandandepana mugasagihani.\* <sup>2</sup> Naep ape'ipi

\* **12:1:** Hi 1:3; Ro 7:21; 1 Ko 9:24-25

pelele' do' pindati Jisas atona anen kofagonama hapif ape'ini, nowatanian netaga andeande'ma mohapifana banagepa atapipa mogape. Fowa' anen okom mapoma dagala anaf na'i nogofa'ani, dei' nalutu banagona. Ea' nofa' lawag usi'igai ti'wanaegai naga'. Anen okom mapoma atiasi nofa' akafimi lu'wami nogaga' lawag agamba, isimba falafisi atis. Anen ina ombal mahana ma ga' inimba, owa'atin. Ea' dei' nape felefele'ma sia Godi lagol kwahisigili nape banagona.

*God naso'apa nimanimi apa' ma nogasindi'amonapa*

<sup>3</sup> Ipa' ukup pendanda' andeande'ma akafimi amamba fowa' nogofa'ami. Epes isimba sanda' waf awafii sowa'ana alafugah Jisas endilisi sanda'ana kwapete'ana. Owa' anen nalutu banagona a'owa'. Ipa' ukup pendapoma isimba ma ina pupulipa ala'uta tehepa, owa'i. Pendape banagepa. <sup>4</sup> Ipa' papa' paloma waf awafi ma pagatalagofaf, apa' ipa' ina dei' papa' pafe' patagama wandaf lu'ufa sahepa esimbel kolo'walambalepa paga', ata' owa'atin.\* <sup>5</sup> A'i ipa' ukup pase'epa ma basef ifimba God nanda'efa ipe'i ma nefela ukup ipe'ipi nogowa' banagaipa? Anen dei' nofalepa batawis ananipai, na'i,

“Awasi ae'ipai, nemaf mamahefa Dembinai nogase'epa akafimi ipe'ma nogasindi'amonepama, ipa' ina pi'i akafimi amamba anen nagase'epami falafumi, owa'. Nemaf mamahefa ni'i nogase'epa nimanimi ma nigasindi'amonepa, ukup

---

\* 12:4: Pro 3:11-12

ipe'ipi ina iwanip, owa'i.\* <sup>6</sup> Dei' main, epes mamahisa Dembinai okom mogamogailas a'owa'i anen nanda'as na'amba atina sonda' waf ananifi usi'ifi. Ea' epes mamahisa numafias niga'i awasi ananisii, nahasa nogasindi'amonasa waf usi'ifi wapani ma sogawaf andeande' sogailaf.”\*

<sup>7</sup> Nemaf mamahefa akafimi lu'wami mogatagamepa, ipa' pindalutu banagepa pi'i aho'ma God nogasindi'amonapa. Anen nonda'mepa waf afambai si'i awasi ananisi. Dei' main, ahapa awasii ina mape matitilis sanda' waf awafi, owa'atin. <sup>8</sup> Ahapas hiami masindi'amonasa same' basef silifa sogape andeande'. Apa' i'i ahamepa owa' nisindi'amonepaea, ipa' ina awasi ananipai endilisi, owa'atin. Ipa' si'i pagataga dowafa amam hiamii. <sup>9</sup> Ipa' ukup pendapoma anif basef wapani ifimba. Apa' itapapai hiapai hi'alapa ahapapa ape'imi masindi'amonapa ea' manifelom masa'ma agof amomugufi. Isimba atis dei' apa' andeande'ma mogafe' lafela Ahamapa nagape ilifi numafi ambagof ape'igufi ma mogofa' ambal namili. <sup>10</sup> Amom ahapapa ape'imi itapami, masindi'amona waf ape'ifi nogota bandata dowaf, mandahama ukup amamipi. Apa' God nasindi'amonapa ma nogatopalopapa endilisi ma mogofa' waf bu'wafi ananifi atef hilili'i.\* <sup>11</sup> Ahamapa naso'apa akafimi ma nagasindi'amonapa, afamba apa' ina mandagala, owa'atin. Ukup ape'ipi iwanip

\* 12:5: Re 3:19

\* 12:6: Diu 8:5; 2 Sml 7:14

\* 12:10: Je

3:17-18

a'owa'. Nahapa nasindi'amonapa ma nonda' hiahawes fasisi sogatagamapa. Hiahawes isimba na'amba. Atiasi monda' waf bu'wafi atef usi'ifi, nelelemb ape'ilimbi sa'ombel.\*

*Apa' mundalutu banagepa dag*

<sup>12</sup> Ipa' sa'ma lagof ipe'igufi dowagof ama gigisilimb banagelemba penda' maol Godi. I'i nembawa bo'wagah ipe'igahi akepigh hok-waepa, ipa' dowagah mehip ea' pilutu banagepa dog.\* <sup>13</sup> Ipa' penda' ufiaw ipe'ikwi usi'ikw kofe'. Ama atiasi epes bo'wagah aogahisi ina awes hi'ilas, owa'atin. Atiasi sogataga be'es wapani.\*

<sup>14</sup> Ipa' dei' pendanda' maol banagambela pigaila waf opalef fegape sa'ombel pegaloma epes hiasii. Ea' pindaila waf afamba usi'if hili'i, pegape Dembinai atipa si'ipa. Epen waf afambai akani, anaf anin ina niti Dembinai, owa'atin.\*

<sup>15</sup> Ipa' solawaipa andeande'. Na'amba anin alipini ipe'ini newa ma waf awafi nelelama God nagatopalopapa dowafa nowambilapai magape andeande'. Na'amba anin alipini ipe'ini nenda' waf awafi si'i lawag augai gail gogola gwa'aisi numbutisii, ea' nese'epa nimanimi ipa' nenda' ipa' hipai petaga awepa ma naep Godi.\*

<sup>16</sup> Na'amba anin epen atitin nila waf awafi so'a waulafi. Ipa' solawaipa andeande'. Na'amba anin epen atitin nese'ana alafuga God si'i fowa' Iso nanda'asa nagatala gwa'aisi nogota bandata,

---

\* **12:11:** Ais 35:3      \* **12:12:** Pro 4:26      \* **12:13:** Sam 34:14;  
Ro 12:18      \* **12:14:** Ap 8:23      \* **12:15:** Jen 25:33-34

ea' nakwaha hiahaom bu'wami ahamana nandondombam magapomanai.\* <sup>17</sup> Ipa' pegawa, anen na'i notambel nefe'ma nogofa' hiahaom amamba bu'wami owa', God na'i owa'atin. Iso nanda'am lef atin napoma nogofa'i hiahaom amamba, owa' a' owa'atin. Ufia'w akana ma notanima nombema nembel nogowa' alafugama waf awafi wapani.\*

*Apa' mataga ea' ma halafuta bu'utai Saion*

<sup>18</sup> Dei' ipa' ina pataga pape felefele'ma anis maefah patilis pagahapilas lagof ipe'igufi, si'i halaf afamba Sainai, owa'atin. Halaf afamba nif lu'wami, a owamb akot alialinai endilisi a fufin lu'unai banagonai,\* <sup>19</sup> a alof nogogali, a anagol malogol gaga'i basefi. Esis amam nematawa Juda sagama' malogol agalemba ganda' basefi, esis ombal mahas sa'ipa Moses dindinip na'amba sa'i, “Apa' mandaiwa' ma mogame'ana wapani.”\*

<sup>20</sup> Dei' main, esis ombal mahas endilisi a'owa' ma basef ifimba God nagaso'asef esisi. Anen naga'i na'amba na'i, “I'i anin epen o anin mafin ami nefe' negatolasa halafuta atambai, ande-ande'ma esis sogahan otamba ma negaga'.”\*

<sup>21</sup> Esis ombal mahas kwapete' endilisi ma hiahaom amamba sagatolomi. Hiahaom amamba lu'wami a'owa' manda' Moses ombal mahana kwapete'a negatolom. Ea' na'i, “Ae' bolale kwapete' ombal mahe ma egatolom.”\*

\* **12:16:** Jen 27:30-40      \* **12:17:** Eks 19:16-20; Diu 4:11-12

\* **12:18:** Eks 20:18-21; Diu 5:22-27      \* **12:19:** Eks 19:12-13

\* **12:20:** Diu 9:19      \* **12:21:** Ga 4:26; Re 5:11

22 Ipa' ina pataga hiahaom amamba, owa'atin. Ipa' ea' pataga halafuta Saion, wambel lu'wambili taun God nagape namona atapinai. Anamba Jerusalem dambaigima nagape heveni. Ipa' patagama ensel hiami hiami a'owa' mandatama mape mandagala.\* 23 Ipa' pafi'i pandakolas paloma epes Godi, awasi ananisi sagali'i. God nanda' agof asasigufi fape wambel ambalemba ilif. Ipa' pafi'i felefele'ma God, anen jas dembinai nowalogas hi'igalasi naloma ambagof epes fowa' God naga'i be'es hilili'i.\* 24 Ea' pafi'i felefele'ma Jisas, anen nagape la'afen nugumafi basef lapafi dambaifi. Ea' pafi'i esimbel ananimbeli fowa' nuwali'ambela ipa', nogowa' banaga basef ifimba lapafi. Esimbel ambalemba bawalapa ano'w ufia'w bu'wakwi a'owa'. Basefa ufia'w akwamba fikila' a'owa' basef Ebeli. Dei' main, basefa esimbel Ebeli fefala Goda nogagwa waf awafi. Apa' esimbel Jisasi atembel God nakwaha waf awafi okom maso'anaf.\*

*Apa' solawaipa andeande'*

25 Ipa' solawaipa andeande'. Na'amba pewa' alafugaha aman anamba dei' naga'ii. Fowa' gani itap apa'e God naso'asa banagafi endilisi esis amam nematawa, owa' sosambala basef ananifi. Fowa' nogota tatumba sogosambalif, ina la'ifisa sofa' sofe' sindihi'ama okom wandafunai Godi, owa'atin. Fowa' God na'if itap apa'e apa' dei' nape heven na'i basef banagef a'owa' ma apa'.

\* 12:22: Lu 10:20      \* 12:23: Hi 8:6, 10:22; 1 Pi 1:2; Jen 4:10

\* 12:24: Hi 2:1-3; Hi 10:26-29

I'i apa mowa' alafugaha anen, anaf apa' wapani ina la'ifipa ma mofa' mefe' mindihi'ama okom wandafunai ananinai, owa'atin endilisi.\*  
 26 Fowa' God nagaso'ana mu'uli ananini Moses, malagol ananigili gakoto'ma itap apa'e. Apa' dei' na'ipapa na'i, "Anaf ae' ikoto'ma itap anef nemaf wapani. Apa' ina ikoto'ma itap atep, owa'. Ikoto'ma itap peloma heven wapani."

27 Basef ifimba faga'i, "Anef nemaf wapani," fihimba'mapa na'amba. Hiahaom fowa' God nanda'ami anaf nokoto'mam mefe' higililam hi'ilam. Apa' anom hiahaom fasimi ma poe bu'wani owa' mondokoto'ia amamba banagem mope atapim.

28 Isimba atis apa' mundanifela God. Dei' main, dei' apa' mawis God nagala'ambemagoma anamba epes ina la'ifisa sogakoto'magon, owa'atin. Apa' monda' lotumana mondasa'ma agol ananigili ma waf ombal mogohapamafi ma mogaila okom ananiami atom.\* 29 Dei' main, God apa' manda' lotumanai, anen a' si'i nif lu'wami fagando hiahaom awami hi'agalam.

## 13

### *Apa' ukup pindapindaila esis alipisi endilisi*

1 Ipa' Kristen, ukup pindaima atina sahin owan ipe'isi atapipa.\* 2 Ipa' ina ukup pese'epama pegatopalopa esis epes anambel wambelisi sogafi'i ifagw ipe'igwii, owa'i. Ipa' pegawa, fowa' gani

\* 12:25: Eks 19:18; Sam 68:8; Hag 2:6 \* 12:28: Diu 4:24, 9:3; Ais 33:14 \* 13:1: Ro 12:13; 1 Pi 4:9; Jen 18:1-8; Jen 19:1-3; Jo 13:34

anis epes sanda' waf afambai, ma sagatopalopa anis daiasi, esis sofa' anom ensel safe' sumafiam ifagw asasiawi. Esis ina sogawa sa'i amom ensel mafi'i, owa'. Sa'i owa' epes atis itapasi.\* <sup>3</sup> Ipa' a' ukup pendapoma esis alipisi sagape sanda' kalabusi si'i ipa' ea' panda' kalabus pagalomas. Ea' ukup pendanda'ma epes isimba sogofa' akafimi nimanimi alop asasipii, petopalopas si'i ipa' atipa pegefa' akafimi alop ipe'ipi pegalomas.\*

<sup>4</sup> Ipa' amam nematawa pandaso'ama ea'i, penda' waf afamba fetaga fendape hilili'. Ipa' ina penda' waf awafi alugufi, owa'i. Dei' main, ipa' pegawa anaf God nogwamipai waf awafi ma amam nematawa sanda' waf so'a waulafii, saloma amam nematawa isimba sagahambombaga daso'amaii.\* <sup>5</sup> Ipa' ina pila waf awafi afamba ukup pegehafela moni a'owa', owa'i. Hiahawes ipa' pagahapilasi, isimba ipa' a' ukup pendanda' na'amba pi'i, "Na'ambai andeande'. Isimba ati-asi dondo'ma apa'."

Dei' main, God na'ias na'i, "Ae' ina anaf okom mose'e ipa' ewa'epa alafuga, owa'atin endilisi."\*

<sup>6</sup> Ea' dei' apa' mondowa' banaga nelelemb ape'ilimbi ea' mi'ias na'amba minda'i, "Dembina'i nagatopalopa ape'i. Apa' ina ombal mohapa, owa'. Atiasi epes la'ifis sonda' maina apa'? Owa'atin endilisi!"\*

*Apa' mondaila waf amom agufumi mugumafi esis Kristeni*

\* **13:2:** Mt 25:36; Hi 10:34  
1 Ti 6:8; Diu 31:6,8; Jos 1:5  
4:16; Hi 6:12

\* **13:3:** Ga 5:19,21; Ef 5:5

\* **13:4:**

\* **13:5:** Sam 118:6

\* **13:6:** 1 Ko



7 Ipa' nomonas sondapoma amom agufumi ipe'imi fowa' magawalapa basef Godi ma ipe'i. Ipa' ukup pendanda'ma fe' bu'wani amamini ea' pefe' pila waf amom magahapifa Godafi.\* 8 Jisas Krai nape na'amba atin si'i nambati', ea' dei' wapani, ea' nope atapina anaf dondol lifilafi.\* 9 Ipa' solawaipa. Na'amba anif basef hiafi fafifafi fifi'i felamona opalef ipe'ilifi ea' pekwaha ufiaw Godi. I'i opalef ape'ilifi fegape atapilifa waf God nagatopalopapa dowafafi numafiapa magape andeande'i, na'ambaifi andeande'. Opalef ape'ilifi ina banagalefa mugaila mu'uli epesi ma gwa'aimi mamimami, owa'atin. Waf afambai sagaila mu'uli inimbafi ina fatopalopa amam nematawa sagailafi, owa'atin.

*Hiahaom God okom maga'iami bu'wami apa' mondolalimanami*

10 Apa' anota belita tape sondolalima Goda, atamba Krai atona naso'ana alop ananipi si'ip nondolalimap naso'anap God. Apa' amom pris mondolalima God ipat atamba selita sanda' lotuwatai, amom ina la'ifima moga' gwa'aisi ma belita atamba, owa'atin.\* 11 Pris anamba dembinai nape nagali' ma pris hiamii anen atona nofa' esimbel amamba nawis ipat nomon wa'ol, nagape atina bo'wagon hilili'ma, nondolalima Goda nogakwaha waf awafi. Apa' mafis alop si'ina mofa'an mawisi manda' nif maofam ando'ma anamba esis Israel sagapoma.\* 12 Isimba atis Jisas wapani nofa' akafimi noga' wambel

\* 13:7: Ef 4:14 \* 13:8: Ro 14:17 \* 13:10: Lev 16:27

\* 13:11: Mt 21:39; Jo 19:17

indambel uta ando'ma nagasa'opas nanda'as bo'wes hilili'ma esimbela ananimbeli.\* <sup>13</sup> Ea' dei' apa' wapani mondafa'ma anen indalelemb ando', ma monda' ambagof ape'igufi awagof si'i anen fowa' nagame' ambal aol.\* <sup>14</sup> Dei' main, apa' mogawa itap apa'e apa' ina anambel wambel taun nagape atapini, owa'atin. Apa' dei' mape manda'as mowando'ma wambel taun inimba anaf na'i nigatagai.\*

<sup>15</sup> Isimba atis dei' mosa'ma agol Godi lu'wagol mondaso'ana dagala atapina ma agol Jisasi, mondanda'am na'amba si'i hiahaom bu'wami mondolalimanami. Apa' mondolalimana na'amba. Mondaso'ana malogof ape'igufi anen a mogawalapa basefa agol ananigili.\* <sup>16</sup> Ipa' ina ukup pese'epama penda' waf fasifima esis amam nematawa, owa'i. Ea' hiahawes saga'oma ipeli pendawalogas pese'asa du'wanis epes isimba hiahawes akasi. Dei' main, God okom maga'iaf a'owa'i waf afambai si'i hiahawes bu'wasi ipa' paso'anasa pindalalimanasi.\*

<sup>17</sup> Amom agufumi ipe'imi, ma'i motopalopepa, ea' mumafi ipa' dondol. Ama anaf amom mogawalapa basefa Goda maol hiani manda'ana mugumafi ipe'ani. Isimba atis dei' ipa' pindaila basef amomifi ea' pendape lafelam. I'i penda'mamas na'amba ma amom sonohama monda' maol inimba ma ukup amamipi ina iwanip melef atin, owa'atin. I'i amom monda'an

\* **13:12:** Hi 11:26, 12:2      \* **13:13:** Hi 11:10,16; Hi 12:22

\* **13:14:** 2 Kro 29:31; Sam 50:14,23; Hos 14:2      \* **13:15:** Fl

4:18      \* **13:16:** Esi 3:17; 1 Te 5:12

mogaloma ukup iwanipi, amambai atiasi ina motopalopepa, owa'atin endilisi.\*

*Beten bu'wani ma mondatopalo pa atin*

<sup>18</sup> Ipa' pendabetena God nogatopalopa afa'. Afa' ogawa malogof fagape opalef afa' nomoni fihimba'mafa wape usi'ifa andeande'. Ea' dei' wa'i ofe' waf usi'ifi hilili'afi nimaguf hiafi dondol. <sup>19</sup> Ae' okom ma'i a'owa' ma ipa' pendabetena God nogatopalope ma atiasi itanima egafe'mago ipa' kwafalis.\*

<sup>20</sup> God anen kofagonama okom awanimi. Anen nasa'ma Dembinai ape'inai Jisas nosafel wapani. Esimbel bagalo Jisasi begewa' banaga basef Godi nagala' lapafi fagape atapif dondoli. Esimbel ambalemba atembel Jisas nataga Dembinai numafi esis Kristen si'i nugumafi sipsipi. <sup>21</sup> Ae' a'i God nowa' banagaipa nese'epa waf bu'wafi hiafi ipa' ma pigaila okom ananiami atom. Ea' a'i anen nonda' opalef ape'ilifi nomon ama mogawalapa waf hiafi fasifi anen okom maga'iafi ma banagami Jisas Kraisi atom. Ea' a'i epes hiasi sosa'ma agol ananigili lu'wagol dondol lifilafi. Endilisi.

*Basef anif du'wanif*

<sup>22</sup> Ipa' alipipai, ae' a'ipipa dindinip, pembe' ali-gah pendagahembe'ma basef anda'afi ma efela ukup ipe'ipi egewa' banagaipa. Dei' main, basef ifi'i ae' anda'efa ipe'i, ifimba bandembandef.

\* **13:17:** Ap 24:16; 2 Ko 1:12

\* **13:19:** Sek 9:11; Ais 55:3; Jer 32:40; Esi 37:26; 1 Pi 2:25

<sup>23</sup> Ae' a'i ipa' pendegawago, esis ea' sakwaha owamapa ape'inai Timoti, ea' ina ata' nanda' kalabus, a' owa'atin. I'i anen nifi'i nogatagama ae' kwafalisa, dao' atiasi afa' biafa ofo'o atin utilipa.

<sup>24</sup> Ipa' penda'mamago nemaf bu'wafi afa'ifi ma amom agufumi hiami ipe'imi molomago esis amam nematawa Godi hiasi hi'indalas. Esis Kristen alipisi sagape Italii sanda'mepago nemaf bu'wafi ipa'.

<sup>25</sup> Ae' a'i God notopalopepa dowaf ea' nope nolomago ipa' hipai nowa' banagaipa. Ea' ma'uf ifimba.

**Basef Bu'wafi Godi**  
**The New Testament in the Mufian Language**  
**Nupela Testamen long tokples Mufian long Niugini**  
copyright © 1998 Wycliffe Bible Translators, Inc.

Language: Mufian

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

---

PDF generated using Haiola and XeLaTeX on 11 Nov 2022 from source files dated 9 Oct 2020

9d2b07f2-4ac7-545a-943c-e16df691ef3f